



# Llawlyfr i staff gorsafoedd pleidleisio

Cefnogi'r etholiadau i Gynulliad Cenedlaethol  
Cymru a Chomisiynwyr yr Heddlu a Throseddu  
ar 5 Mai 2016

## Cyfieithiadau a fformatau eraill

Mae ein canllawiau a'n hadnoddau ar gyfer yr etholiadau hyn hefyd ar gael yn Saesneg.

I gael gwybodaeth am sut i gael y cyhoeddiad hwn mewn iaith arall, neu mewn print bras neu Braille, cysylltwch â'r Comisiwn Etholiadol:

Ffôn: 020 7271 0500

E-bost: [publications@electoralcommission.org.uk](mailto:publications@electoralcommission.org.uk)

Llawlyfr i staff gorsafoedd pleidleisio. Cod archeb: NAW-PCC16G001W

(h) Y Comisiwn Etholiadol 2016

# Cynnwys

1	Cyflwyniad	1	6	Diwedd y pleidleisio	18
2	Yr etholiadau a thîm yr orsaf bleidleisio	2		Gweithdrefnau	18
	Etholiadau i Gynulliad Cenedlaethol Cymru	2		Cwblhau'r gwaith papur	19
	Etholiadau ar gyfer Comisiynwyr yr Heddlu a Throsedd	2		Pacio deunyddiau yn yr orsaf bleidleisio	20
	Rolau a chyfrifoldebau tîm yr orsaf bleidleisio	2		Cludo deunyddiau'r etholiad i'r ganolfan dilysu a chyfrif pleidleisiau	20
3	Cyn y diwrnod pleidleisio	4		<b>Atodiad 1 - Materion yn ymwneud â chydraddoldeb</b>	21
	Hyfforddiant i staff gorsafoedd pleidleisio	4		Etholwyr anabl ac etholiadau	21
	Lleoliad yr orsaf bleidleisio	4		Cymorth i etholwyr sy'n methu â mynd i mewn i'r orsaf bleidleisio	21
	Safonau ymddangosiad	5		Pleidleiswyr anabl	21
	Cysylltu ag aelodau eraill o'r tîm	5		Pobl ddall neu rannol ddall	22
	Dosbarthu neu gasglu'r blwch/blychau pleidleisio	5		Pobl fyddar-ddall	23
		5		Pobl fyddar	23
		5		Galluedd meddyliol, anabledd a phleidleisio	23
4	Diwrnod pleidleisio: cyn i'r bleidlais agor	6		<b>Atodiad 2 - Delio â phroblemau yn y gofrestr etholwyr</b>	24
	Cyrraedd yr orsaf bleidleisio	6		Oedran - hawl i bleidleisio	24
	Beth sy'n digwydd os na fydd deiliad yr allwedd yn bresennol?	6		Enwau wedi'u camsillafu a phleidleiswyr sydd wedi newid eu henw	24
	Gwirio cyflenwadau a deunyddiau	6		Etholwyr eraill	24
	Cynllun yr orsaf bleidleisio	7		Person nad yw'n ymddangos yn y gofrestr etholwyr	24
	Arwyddion a hysbysiadau	8		Gwallau clercol yn y gofrestr	24
	Pwy all fod yn bresennol yn yr orsaf bleidleisio?	8		Unrhyw berson arall nad yw'n ymddangos yn y gofrestr etholwyr	25
	Selio'r blwch neu'r blychau pleidleisio	11		<b>Atodiad 3 - Gweithdrefn ar gyfer pleidleiswyr post a dirprwyon</b>	26
	Rhai tasgau munud olaf i'w cwblhau	11		Pleidleiswyr post	26
5	Diwrnod pleidleisio: agor a chynnal y bleidlais	12		Dirprwyon	27
	Agor yr orsaf bleidleisio	12			
	Crynodeb o'r drefn bleidleisio	12			
	Cam un - cadarnhau pwy yw'r pleidleisiwr	12			
	Cam dau - rhoi'r papurau pleidleisio	14			
	Cam tri - pleidleisio	15			

Atodiad 4 - Etholwyr â chofnod dienw yn y gofrestr	30	Atodiad 8 - Arweiniad ar rifwyr, y cyfryngau a pholau ymadael	40
Gweithdrefn ar gyfer rhoi papurau pleidleisio i etholwyr â chofnod dienw	30	Rhifwyr	40
Beth os bydd etholwyr â chofnod dienw yn ymddangos yn yr orsaf bleidleisio heb gerdyn pleidleisio?	30	Y cyfryngau	40
		Polau ymadael	41
Atodiad 5a - Y cwestiynau rhagnodedig	31	Atodiad 9 - Iechyd a diogelwch	42
		Iechyd a diogelwch staff yr orsaf bleidleisio ac etholwyr	42
Atodiad 5b - Papurau pleidleisio a gyflwynwyd	35	Codi gwrthrychau trwm	42
Amgylchiadau pan ddylid rhoi papurau pleidleisio a gyflwynwyd	35	Atodiad 10 - Cwestiynau cyffredin a ofynnir i staff gorsafoedd pleidleisio ar y diwrnod pleidleisio	43
Gweithdrefn ar gyfer rhoi papurau pleidleisio a gyflwynwyd	35	Atodiad 11 - Rhestr wirio ar gyfer gosod yr orsaf bleidleisio	45
Rhesymau dros gwblhau papurau pleidleisio a gyflwynwyd	36		
Atodiad 6 - Diogelwch yn yr orsaf bleidleisio	37		
Cadw trefn	37		
Aflonyddwch neu ddigwyddiadau difrifol a gohirio'r bleidlais	37		
Delio â sefyllfaoedd anodd	38		
Atodiad 7 - Gweithdrefn ar gyfer delio â chambersonadu	39		
Beth sy'n digwydd os bydd staff gorsaf bleidleisio yn amau bod rhywun yn cambersonadu etholwr neu ddirprwy?	39		
Beth sy'n digwydd os bydd asiant etholiad, asiant pleidleisio neu ymgeisydd yn herio pleidleisiwr?	39		
Beth sy'n digwydd os bydd yn ymddangos bod rhywun arall (heblaw am ddirprwy) wedi pleidleisio ar ran y pleidleisiwr?	39		

# 1 Cyflwyniad

Diben y llawlyfr hwn yw cynorthwyo staff gorsafoedd pleidleisio sy'n gweithio yn yr etholiadau ar gyfer Cynulliad Cenedlaethol Cymru a Chomisiynwyr yr Heddlu a Throseddu yng Nghymru. Mae'n disgrifio'r gweithdrefnau y mae'n rhaid eu dilyn a sut i ddelio ag unrhyw beth a allai ddigwydd.

Fel staff gorsafoedd pleidleisio, rydych yn chwarae rhan ganolog yn yr etholiadau. Mae eich rôl yn hanfodol er mwyn sicrhau bod gan bleidleiswyr, pleidiau gwleidyddol, ymgeiswyr ac asiantiaid hyder yn y broses etholiadol.

Cewch hyfforddiant ar eich rôl, ond dylech ddarllen y llawlyfr hwn yn ofalus cyn y diwrnod pleidleisio er mwyn sicrhau eich bod yn gyfarwydd â'r holl brosesau a ddisgrifir ynddo.

Cyfeirir at y Swyddog Canlyniadau drwy'r llawlyfr hwn gan mai'r Swyddog Canlyniadau perthnasol sy'n gyfrifol am y rhan fwyaf o'r trefniadau ar gyfer cynnal y bleidlais. Yn ymarferol, fodd bynnag, y gweinyddwr etholiadol sy'n gyfrifol am y gwaith beunyddiol o redeg etholiadau. Bydd staff gorsafoedd pleidleisio yn cael manylion cyswllt lleol cyn y diwrnod pleidleisio ac mae'n debygol mai'r swyddfa etholiadau fydd y pwynt cyswllt cyntaf.

## 2 Yr etholiadau â thîm yr orsaf bleidleisio

### Etholiadau i Gynulliad Cenedlaethol Cymru

Caiff aelodau o Gynulliad Cenedlaethol Cymru eu hethol o dan y system etholiadol aelodau ychwanegol. O dan y system hon, rhoddir dau bapur pleidleisio i bleidleiswyr: un ar gyfer yr etholiad etholaethol ac un ar gyfer yr etholiad rhanbarthol.

Ar y papur pleidleisio etholaethol, gofynnir i bleidleiswyr roi 'X' wrth ymyl yr ymgeisydd o'u dewis. Ar y papur pleidleisio rhanbarthol, gofynnir i bleidleiswyr roi 'X' wrth ymyl y blaid neu'r ymgeisydd unigol o'u dewis.

Mae 60 o Aelodau Cynulliad (ACau) yng Nghynulliad Cenedlaethol Cymru – 40 o ACau etholaethol ac 20 o ACau rhanbarthol, gyda 4 AC rhanbarthol yn cael eu hethol i gynrychioli pob un o'r 5 rhanbarth etholiadol.

### Etholiadau ar gyfer Comisiynwyr yr Heddlu a Throseddau

Mewn etholiad ar gyfer Comisiynydd yr Heddlu a Throseddau sy'n cynnwys mwy na dau ymgeisydd, defnyddir y system etholiadol pleidlais atodol. O dan y system hon gall pleidleiswyr bleidleisio dros yr ymgeisydd dewis cyntaf ac ail ddewis y maent am iddo gael ei ethol. Bydd y papur pleidleisio yn rhestru pob ymgeisydd sy'n sefyll yn yr ardal heddlu a bydd pleidleiswyr yn pleidleisio dros eu hymgeisydd dewis cyntaf drwy nodi 'X' yn y golofn dewis cyntaf ac yn pleidleisio dros eu hymgeisydd ail ddewis drwy nodi 'X' yn y golofn ail ddewis.

Cyhyd â'u bod yn nodi 'X' yn y golofn dewis cyntaf, caiff eu pleidlais ei chyfrif. Gall pleidleiswyr ddewis peidio â nodi ail ddewis. Os mai dim ond ail ddewis y byddant yn ei nodi, ni chaiff eu pleidlais ei chyfrif.

Fodd bynnag, os mai dim ond dau ymgeisydd sy'n sefyll, etholir Comisiynydd yr Heddlu a Throseddau o dan system etholiadol y cyntaf i'r felin. Yn yr achos hwn, gofynnir i bleidleiswyr roi 'X' yn y blwch wrth ymyl yr ymgeisydd o'u dewis ar y papur pleidleisio.

### Rolau a chyfrifoldebau tîm yr orsaf bleidleisio

Rôl staff yr orsaf bleidleisio yw sicrhau y gall pleidleiswyr fwrw eu pleidlais yn gyfrinachol, heb ddod o dan ddylanwad ac mewn awyrgylch tawel, digyffro.

Dylai'r Swyddog Llywyddu a'r Clercod Pleidleisio allu cyflawni dyletswyddau ei gilydd yn ôl yr angen. Fodd bynnag, Swyddogion Llywyddu sy'n bennaf cyfrifol am yr orsaf bleidleisio ac mae ganddynt rôl oruchwylio ychwanegol i'w chwarae. Hefyd, yn gyfreithiol, mae nifer o ddyletswyddau na allant gael eu cyflawni gan unrhyw un arall heblaw am Swyddogion Llywyddu, sef:

- gofyn i swyddog heddlu hebrwng rhywun o orsaf bleidleisio (gweler Atodiad 6)
- gofyn y cwestiynau rhagnodedig (gweler Atodiad 5a)
- cyfyngu ar nifer yr arsylwyr achrededig sy'n bresennol ar unrhyw adeg (gweler Pennod 4)

### Dyletswyddau'r Swyddog Llywyddu

Swyddogion Llywyddu sy'n gyfrifol am gynnal y pleidlais yn yr orsaf bleidleisio a dylai fod ganddynt wybodaeth gadarn am y trefniadau pleidleisio.

Prif ddyletswyddau'r Swyddog Llywyddu yw:

- cydymffurfio ag unrhyw gyfarwyddiadau a gyhoeddir gan y Swyddog Canlyniadau
- sicrhau cyfrinachedd a diogelwch y pleidlais

- trefnu cynllun yr orsaf bleidleisio a chysylltu, os oes angen, â deiliad allwedd yr adeilad
- rhoi cyfarwyddyd i'r Clercod Pleidleisio a goruchwyllo eu gwaith
- agor a chau'r orsaf bleidleisio ar amser
- cadw trefn yn yr orsaf bleidleisio
- bod yn gwrtais ac yn broffesiynol wrth ddelio ag etholwyr, ymgeiswyr ac asiantiaid, ac eraill y mae hawl ganddynt fod yn bresennol yn yr orsaf bleidleisio
- gweithio mewn ffordd ddiuedd bob amser
- rhoi cyfrif am yr holl bapurau pleidleisio, gwaith papur a'r blwch/blychau pleidleisio a bod yn gyfrifol amdanynt
- gofyn y cwestiynau rhagnodedig i bleidleiswyr pan fo angen, gan gynnwys pan fydd ymgeiswyr neu asiantiaid yn gofyn iddynt wneud hynny neu cyn rhoi papurau pleidleisio a gyflwynwyd
- sicrhau bod y drefn bleidleisio briodol yn cael ei dilyn, gan sicrhau y caiff y rhestr neu'r rhestrau rhifau cyfatebol eu marcio'n gywir
- sicrhau, pan fyddant hwy neu eu Clerc Pleidleisio yn rhoi papurau pleidleisio, bod y marc swyddogol ar y papurau hynny a'u bod yn cael eu rhoi'n gywir i etholwyr cymwys
- delio â threfniadau pleidleisio arbennig fel y bo angen
- derbyn unrhyw bleidleisiau post a gyflwynir gan etholwyr
- rheoli presenoldeb y sawl y mae hawl ganddynt i fod yn bresennol yn yr orsaf bleidleisio, e.e. ymgeiswyr ac asiantiaid, cynrychiolwyr y Comisiwn Etholiadol ac arsylwyr achrededig, a sicrhau nad ydynt yn ymyrryd â'r broses bleidleisio
- monitro gweithgareddau rhifwyr y tu allan i fannau pleidleisio a sicrhau nad ydynt yn ymyrryd â'r broses bleidleisio
- cadw'r orsaf bleidleisio yn lân ac yn daclus
- sicrhau bod yr holl arwyddion a hysbysiadau yn glir, yn weladwy ac yn aros yn eu lle drwy'r dydd

Os bydd mwy nag un orsaf bleidleisio mewn adeilad, caiff y Swyddog Llywyddu neu staff etholiadol benodi un o'r Swyddogion Llywyddu i fod yn bennaf cyfrifol am y man pleidleisio.

## Dyletswyddau'r Clerc Pleidleisio

Nid oes gan Glercod Pleidleisio yr un cyfrifoldebau â'r Swyddog Llywyddu, ond dylent fod yn ymwybodol o'r holl drefniadau pleidleisio a sut i ddelio ag unrhyw broblemau.

Prif ddyletswyddau'r Clerc Pleidleisio yw:

- cydymffurfio â chyfarwyddiadau'r Swyddog Canlyniadau a'r Swyddog Llywyddu
- helpu i drefnu'r orsaf bleidleisio a pharatoi i agor y bleidlais
- bod yn gwrtais ac yn broffesiynol wrth ddelio â phleidleiswyr, ymgeiswyr ac asiantiaid, cynrychiolwyr y Comisiwn Etholiadol ac arsylwyr achrededig
- gweithio mewn ffordd ddiuedd bob amser
- sicrhau bod etholwyr yn gymwys i bleidleisio yn yr etholiadau ac yn yr orsaf bleidleisio hon
- cadarnhau a marcio rhifau etholwyr pleidleiswyr yn y gofrestr etholwyr
- ar y rhestr neu'r rhestrau rhifau cyfatebol, ysgrifennu rhif etholwr y pleidleisiwr wrth ymyl rhifau'r papurau pleidleisio a roddwyd iddo
- rhoi papurau pleidleisio i bleidleiswyr yn ôl cyfarwyddyd y Swyddog Llywyddu, gan sicrhau bod y marc swyddogol arnynt
- sicrhau bod pleidleiswyr yn bwrw eu pleidlais yn gyfrinachol
- cadw cyfrinachedd y bleidlais bob amser
- ateb cwestiynau pleidleiswyr, lle bo hynny'n briodol, mewn modd cyfeillgar a phroffesiynol
- helpu ag unrhyw ddyletswyddau eraill sy'n ymwneud â'r orsaf bleidleisio yn ôl cyfarwyddyd y Swyddog Llywyddu
- cynorthwyo'r Swyddog Llywyddu i gwblhau'r gweithdrefnau angenrheidiol ar ôl i'r pleidleisio ddod i ben

## 3 Cyn y diwrnod pleidleisio

### Hyfforddiant i staff gorsafoedd pleidleisio

Bydd angen i staff gorsafoedd pleidleisio gael gwybodaeth lawn am yr etholiadau ac ni allant ddibynnu ar brofiad blaenorol yn unig. Ni ddylai staff gorsafoedd pleidleisio ddibynnu'n gyfan gwbl ar y llawlyfr hwn chwaith. Dylai Swyddogion Canlyniadau fod wedi trefnu hyfforddiant neu sesiynau briffio cyn yr etholiadau a byddant yn disgwyl i staff gorsafoedd pleidleisio fod yn bresennol.

### Leoliad yr orsaf bleidleisio

Caiff Swyddogion Canlyniadau eu penodi i gynnal yr etholiadau. Swyddogion Canlyniadau sy'n penderfynu faint o orsafoedd pleidleisio sydd eu hangen, ym mhle y dylent fod a faint o Swyddogion Llywyddu a Chlercod Pleidleisio sydd eu hangen i'w staffio.

Peidiwch â chymryd yn ganiataol y bydd gorsaf bleidleisio yn yr un man ag y bu ar gyfer etholiadau neu refferenda blaenorol. Bydd y Swyddog Canlyniadau yn rhoi gwybodaeth am leoliad yr orsaf bleidleisio pan gaiff penodiadau eu gwneud. Dylai pob aelod o dîm yr orsaf bleidleisio wybod ble mae'r orsaf bleidleisio cyn y diwrnod pleidleisio.

Efallai y bydd y Swyddog Canlyniadau yn gofyn i Swyddogion Llywyddu ymweld â'r orsaf bleidleisio cyn y diwrnod pleidleisio. Os felly, dylent drefnu amser sy'n gyfleus iddynt hwy a deiliad yr allwedd. Bob amser, dim ond ar ôl cael caniatâd deiliad yr allwedd y dylid cael mynediad i orsaf bleidleisio cyn y diwrnod pleidleisio. Byddwch yn ymwybodol o'r sensitifrwydd sy'n gysylltiedig ag ymweld â safleoedd awdurdodau lleol yn ystod oriau gwaith (yn enwedig sefydliadau addysgol a gofal cymdeithasol). Os yn bosibl, gall fod yn ddefnyddiol cyfarfod ag aelodau eraill o'r tîm yn

yr orsaf bleidleisio cyn y diwrnod pleidleisio er mwyn gweld pa gyfleusterau sydd ar gael a thrafod pa gyflenwadau a lluniaeth a all fod eu hangen.

Gall rhai safleoedd gynnwys dwy orsaf bleidleisio neu fwy. Os felly, dylai Swyddogion Llywyddu, ar gyfarwyddyd y tîm etholiadau, gydlyn unrhyw ymweliad â'r safle cyn y diwrnod pleidleisio â'r Swyddogion Llywyddu eraill. Bydd deiliad yr allwedd yn gwerthfawrogi hyn a bydd yn galluogi cydweithwyr i drafod mynedfa, allanfa a chynllun pob un o'r gorsafoedd pleidleisio.

Dylai deiliad yr allwedd agor yr adeilad erbyn 6.30am fan hwyraf ar y diwrnod pleidleisio. Os na fydd y person priodol ar gael i agor yr adeilad, gall y swyddfa etholiadau ofyn i'r Swyddogion Llywyddu wneud trefniadau i gasglu'r allweddi cyn y diwrnod pleidleisio. Os bydd hyn yn digwydd, dylai Swyddogion Llywyddu sicrhau bod ganddynt yr holl allweddi perthnasol, gan gynnwys allweddi i unrhyw gatiâu, a manylion unrhyw larymau, a sicrhau bod rhif ffôn a chyfeiriad deiliad yr allwedd wrth law pe bai rhywbeth yn mynd o'i le.

Dylai staff gorsafoedd pleidleisio ystyried faint o amser y bydd yn ei gymryd iddynt fynd i'r orsaf bleidleisio ar fore'r etholiadau a chadw hyn mewn cof pan fyddant yn trefnu eu diwrnod. Drwy gyrraedd mewn da bryd, gall staff sicrhau bod yr orsaf bleidleisio wedi'i gosod yn briodol cyn i'r bleidlais agor am 7am.

Dylai staff gorsafoedd pleidleisio sicrhau bod ganddynt ddigon o fwyd a diod ar gyfer y diwrnod pleidleisio cyfan, gan na fyddant yn gallu gadael y man pleidleisio yn ystod y cyfnod pleidleisio.



## Safonau ymddangosiad

Dylai awyrgylch yr orsaf bleidleisio fod yn gyfeillgar a phroffesiynol, a dylai staff yr orsaf bleidleisio wisgo'n unol â hynny. Fodd bynnag, bydd y staff yn yr orsaf bleidleisio drwy'r dydd a dylent ystyried eu cysur personol hefyd.

Cofiwch fod staff gorsafoedd pleidleisio yn cynrychioli'r Swyddog Canlyniadau ac y dylent fod yn ddiduedd bob amser. Rhaid peidio â gwisgo unrhyw fathodynau, sloganau neu liwiau a allai godi amheuaeth ynglŷn â didueddrwydd staff yr orsaf bleidleisio.

## Cysylltu ag aelodau eraill o'r tîm

Gall Swyddogion Canlyniadau roi manylion cyswllt unrhyw Clerc(od) Pleidleisio sydd ar ddyletswydd yn yr un orsaf bleidleisio i'r Swyddog Llywyddu. Os byddant yn gwneud hynny, dylai'r Swyddog Llywyddu gysylltu â'r Clerc(od) Pleidleisio cyn y diwrnod pleidleisio er mwyn sicrhau eu bod yn gwybod ble mae'r orsaf bleidleisio a pha amser y mae angen iddynt gyrraedd.

## Dosbarthu neu gasglu'r blwch/ blychau pleidleisio

Oni bai bod y blwch neu'r blychau pleidleisio yn cael eu dosbarthu'n uniongyrchol i'r orsaf bleidleisio, bydd y Swyddog Canlyniadau yn hysbysu'r Swyddogion Llywyddu am y trefniadau ar gyfer casglu'r blwch neu'r blychau pleidleisio ynghyd â holl ddeunyddiau perthnasol yr etholiad. Os bydd y Swyddog Llywyddu yn casglu'r blwch neu'r blychau pleidleisio a deunyddiau eraill yr etholiad ac yn eu cadw yn ei gartref, rhaid cymryd pob gofal i sicrhau eu diogelwch bob amser. Yn benodol, ni ddylid byth adael unrhyw ddeunyddiau etholiad mewn car gwag.

## 4 Diwrnod pleidleisio: cyn i'r bleidlais agor

Rhaid i'r orsaf bleidleisio agor am 7am. Peidiwch â bod yn hwyr. Rhaid i chi hysbysu'r swyddfa etholiadau cyn gynted â phosibl os bydd unrhyw broblemau'n codi a all eich atal rhag agor am 7am.

### Cyrraedd yr orsaf bleidleisio

Rhaid i Swyddogion Llywyddu a Chlercod Pleidleisio gyrraedd yr orsaf bleidleisio erbyn 6.30am. Gwnewch yn siŵr eich bod yn caniatáu digon o amser i gyrraedd yr orsaf bleidleisio - peidiwch â bod yn hwyr. Rhaid i unrhyw aelodau o staff gorsafoedd pleidleisio sy'n hwyr am resymau na allant eu hosgoi neu staff na allant fynd i'r orsaf bleidleisio gysylltu â'r swyddfa etholiadau ar unwaith.

Rhaid i Swyddogion Llywyddu wneud yn siŵr bod pob oriawr neu gloc yn gywir er mwyn sicrhau bod yr orsaf bleidleisio ar agor ar amser.

Dylai Swyddogion Llywyddu gasglu hysbysiad penodi'r Clerc Pleidleisio a sicrhau ei fod yn ymwybodol o'r angen i gadw cyfrinachedd.

### Beth sy'n digwydd os na fydd deiliad yr allwedd yn bresennol?

Yn gyntaf, ceisiwch gysylltu ag ef, naill ai dros y ffôn neu drwy anfon aelod o dîm yr orsaf bleidleisio i'w gartref. Os na ellir agor yr orsaf, cysylltwch â'r swyddfa etholiadau i roi gwybod am y sefyllfa a gofyn am ragor o gyfarwyddiadau. Os bydd angen, sefydlwch orsaf bleidleisio dros dro. Efallai y bydd digon o le wrth fynedfa'r adeilad, neu hyd yn oed y tu allan i'r adeilad. Mewn rhai achosion, mae Swyddogion Llywyddu wedi defnyddio cefn car. Beth bynnag fo'r sefyllfa, rhaid i bleidleiswyr allu pleidleisio'n gyfrinachol o 7am ymlaen.

Hysbyswch y swyddfa etholiadau ac unrhyw ymgeiswyr, asiantiaid ac arsylwyr sy'n bresennol am unrhyw drefniadau a wnewch.

### Gwirio cyflenwadau a deunyddiau

Oni bai bod y Swyddog Canlyniadau yn eu cyflenwi'n uniongyrchol i'r orsaf bleidleisio, y Swyddog Llywyddu fydd yn gyfrifol am gludo'r blwch neu'r blychau pleidleisio a deunyddiau'r etholiad i'r orsaf. Fel rheol, bydd yr eitemau mwy, fel bythau pleidleisio, wedi'u dosbarthu i'r safle ymlaen llaw. Bydd y Swyddog Canlyniadau yn hysbysu Swyddogion Llywyddu am y trefniadau.

Caiff rhestr wirio o gyflenwadau gorsafoedd pleidleisio ei darparu gyda'r blwch neu'r blychau pleidleisio ac unrhyw ddeunyddiau eraill ar gyfer gorsafoedd pleidleisio. Wrth wirio'r cynnwys, os gwelwch fod unrhyw eitemau o gyfarpar neu ddeunyddiau a restrir ar goll, cysylltwch â'r Swyddog Canlyniadau ar unwaith. Dylid gwirio deunyddiau wrth iddynt gyrraedd. Byddwch yn ofalus wrth godi'r deunyddiau neu'r cyfarpar; gallant fod yn drwm (gweler Atodiad 9 am wybodaeth am iechyd a diogelwch).

Dylai'r Swyddog Llywyddu sicrhau bod y papurau pleidleisio yn dilyn trefn rifol, ac mai dyma'r papurau cywir ar gyfer yr orsaf bleidleisio ac nad oes unrhyw wallau amlwg o ran rhifau'r papurau.

Dylid gwirio'r rhifau ar gefn y papurau pleidleisio yn erbyn rhifau'r papurau pleidleisio sydd wedi'u hargraffu ar y rhestr neu'r rhestrau rhifau cyfatebol. Dylid gwneud hyn cyn i'r bleidlais agor. Dylid rhoi'r papurau pleidleisio gan ddilyn y drefn sydd wedi'i hargraffu ar y rhestr neu'r rhestrau rhifau cyfatebol. Os na fydd y rhifau'n cyfateb, cysylltwch â'r Swyddog Canlyniadau ar unwaith.

Os bydd y Swyddog Canlyniadau wedi darparu'r datganiadau ynghylch y personau a'r pleidiau a enwebwyd, dylai'r Swyddog Llywyddu hefyd wneud yn siŵr bod manylion yr ymgeiswyr a'r pleidiau ar y papurau pleidleisio yn cyfateb i'r rhai ar y datganiadau hynny.

Peidiwch â rhoi papurau pleidleisio sy'n cynnwys gwallau neu brint aneglur.

## Cynllun yr orsaf bleidleisio

Y dasg gyntaf ar ôl cyrraedd fydd gosod yr orsaf bleidleisio, oni bai bod rhywun eisoes wedi gwneud hyn ar eich rhan. Mae cynllun yr ystafell yn bwysig. Gallai cynllun gwan beri dryswch diangen a phroblemau mynediad. Mae Atodiad 11 yn cynnwys rhestr wirio ar gyfer gosod yr orsaf bleidleisio ac arddangos hysbysiadau. Hyd yn oed os yw'r orsaf bleidleisio wedi'i gosod ar eich rhan, dylech sicrhau o hyd ei bod wedi'i gosod yn briodol gan ddefnyddio'r rhestr wirio yn Atodiad 11.

Efallai bod gofalmwr wedi trefnu'r ystafell yn barod, yn enwedig os yw'r Swyddog Canlyniadau neu'r Swyddog Llywyddu wedi rhoi cyfarwyddiadau iddynt ynglŷn â chynllun yr orsaf bleidleisio ymlaen llaw. Fodd bynnag, mae'n bosibl y bydd yn rhaid i staff yr orsaf bleidleisio osod yr ystafell neu ad-drefnu'r dodrefn. Mae rhai bythau pleidleisio yn drwm; byddwch yn ofalus wrth eu gosod neu eu symud (gweler Atodiad 9 am gyngor ar faterion yn ymwneud ag iechyd a diogelwch).

Ar y dudalen nesaf, ceir enghreifftiau o gynlluniau ar gyfer ystafell lle ceir un orsaf bleidleisio ac ystafell lle ceir mwy nag un orsaf bleidleisio. Canllaw yw'r rhain ac efallai y bydd angen eu haddasu yn unol ag amgylchiadau lleol.

Rhaid i'r cynllun fod yn addas i'r pleidleisiwr a helpu i sicrhau bod yr orsaf bleidleisio yn rhedeg yn hwylus. Yn benodol, rhaid ystyried anghenion pleidleiswyr ag amrywiaeth o anabledau.

Er enghraifft:

- A yw'r blwch neu'r blychau pleidleisio yn hygyrch i bob pleidleisiwr?
- A all defnyddiwr cadair olwyn fynd o gwmpas yr orsaf bleidleisio a'r ardal gyfagos yn ddidrafferth?



- A yw'r holl fythau pleidleisio wedi'u gosod mewn ffordd sy'n parchu preifatrwydd pleidleisio pob pleidleisiwr?
- A yw'r bwth pleidleisio lefel isel yn y safle mwyaf priodol i ddefnyddwyr cadeiriau olwyn, gyda digon o le i gadair olwyn symud yn hwylus?
- A yw'r hysbysiadau yn hygyrch i bob pleidleisiwr?
- A yw'r bythau pleidleisio wedi'u lleoli er mwyn gwneud y defnydd gorau o'r golau sydd ar gael?
- A yw'r asiantiaid pleidleisio a'r arsylwyr wedi'u lleoli fel nad ydynt yn ymyrryd â'r gweithrediadau ond eu bod yn dal yn gallu eu gweld?
- A oes seddi ar gael yn yr orsaf bleidleisio i etholwyr na allant sefyll am gyfnodau hir?

Ym mhob achos:

- Defnyddiwch y rhestr wirio yn Atodiad 11 wrth osod yr orsaf bleidleisio neu wrth sicrhau ei bod wedi'i gosod yn gywir.
- Gwnewch yn siŵr nad yw'r bythau pleidleisio wedi'u lleoli mewn mannau lle gall pobl y tu allan weld sut mae pleidleiswyr yn marcio eu papurau pleidleisio.
- Trefnwch y blwch neu'r blychau pleidleisio a'r bythau pleidleisio fel eu bod yn hygyrch i bob pleidleisiwr, ond eto i gyd yn weladwy i staff yr orsaf bleidleisio.
- Gosodwch y bwrdd rhoi papurau a'r blwch neu'r blychau pleidleisio mewn ffordd sy'n atal unrhyw bleidleisiwr rhag gadael yr orsaf bleidleisio heb basio heibio i chi a'r blwch neu'r blychau pleidleisio.
- Ystyriwch pa drefniadau y byddai angen i chi eu gwneud er mwyn gallu derbyn pleidleiswyr yn ystod cyfnodau prysur a delio â hwy.
- Gwnewch yn siŵr bod gennych fanylion cyswllt y swyddfa etholiadau a dilynwch unrhyw weithdrefnau uwchgyfeirio yn ôl cyfarwyddyd y Swyddog Canlyniadau os bydd unrhyw faterion yn codi yn ystod y diwrnod pleidleisio.

Mewn ystafell â mwy nag un orsaf bleidleisio, cofiwch fod yn rhaid cadw'r blychau pleidleisio ar wahân. Fel arall, gall pleidleiswyr o un orsaf bleidleisio roi eu papur pleidleisio yn y blwch pleidleisio anghywir mewn camgymeriad ac ni fydd cyfrifon papurau pleidleisio'r ddwy orsaf bleidleisio yn cyfateb.

Hyd yn oed os bydd y blychau pleidleisio yn cael eu cadw ar wahân, dylai staff fod yn wylidwrus o hyd oherwydd gallai pleidleiswyr ddrysus ynghylch pa flwch pleidleisio y dylent ei ddefnyddio.



## Arwyddion a hysbysiadau

Meddylwch am ddiben pob arwydd a hysbysiad wrth eu gosod i fyny. Cerddwch y llwybr y mae disgwyl i'r pleidleisiwr ei ddilyn, gan wirio pob arwydd a hysbysiad. Mae rhai arwyddion a hysbysiadau yn rhoi cyfarwyddiadau tra bod eraill yn rhoi gwybodaeth i bleidleiswyr.

Gwnewch yn siŵr eu bod wedi'u gosod fel y gall pob pleidleisiwr eu darllen, gan gynnwys y rhai mewn cadeiriau olwyn.

Rhaid arddangos yr hysbysiad 'Sut i bleidleisio yn yr etholiadau hyn' y tu mewn a'r tu allan i'r orsaf bleidleisio. Os bydd y Swyddog Canlyniadau wedi darparu'r fath hysbysiadau mewn Braille, mewn ieithoedd eraill heblaw Cymraeg a Saesneg, neu ar ffurf darluniau, dylai'r rhain hefyd gael eu harddangos y tu mewn a'r tu allan i'r orsaf bleidleisio.

Yr unig hysbysiad y dylid ei arddangos ym mhob bwth pleidleisio yw'r un sy'n rhoi gwybodaeth am sut i farcio'r papurau pleidleisio yn yr etholiadau hyn. Os bydd y Swyddog Canlyniadau wedi darparu unrhyw hysbysiadau o'r fath mewn ieithoedd a fformatau eraill, e.e. mewn Braille, mewn ieithoedd eraill heblaw Cymraeg a Saesneg, neu ar ffurf darluniau, dylai'r rhain hefyd gael eu harddangos y tu mewn i'r bwth bleidleisio Ni ddylid arddangos unrhyw hysbysiadau eraill yn y bwth pleidleisio.

Rhaid arddangos copi sampl mawr o bob un o'r papurau pleidleisio y tu mewn i'r orsaf bleidleisio hefyd, yn ddefnyddiol mewn man â digon o olau lle gall pleidleiswyr eu gweld yn hawdd cyn cael eu papurau pleidleisio.

Bydd y Swyddog Canlyniadau hefyd yn darparu copi llaw mwy o faint o bob un o'r papurau pleidleisio, gyda'r gair 'sampl' arnynt. Gall pleidleiswyr sy'n rhannol ddall fynd â'r rhain gyda nhw i'r bwth pleidleisio er mwyn cyfeirio atynt wrth farcio eu papurau pleidleisio.

Gwnewch yn siŵr nad oes unrhyw ddeunydd y gellir dehongli ei fod yn cefnogi safbwyntiau unrhyw blaid neu ymgeisydd sy'n cymryd rhan yn yr etholiadau wedi'i arddangos yn y safle neu ar y safle. Os gwelir unrhyw ddeunyddiau o'r fath, rhaid eu tynnu i lawr neu eu gorchuddio.

## Pwy all fod yn bresennol yn yr orsaf bleidleisio?

Mae'r gyfraith yn rhoi hawl benodol i unigolion penodol fod yn bresennol mewn gorsafedd pleidleisio (yn ogystal â staff etholiadau a phleidleiswyr), fel a ganlyn:

- ymgeiswyr etholaethol yn yr etholiad i Gynulliad Cenedlaethol Cymru
- ymgeiswyr rhanbarthol unigol yn yr etholiad i Gynulliad Cenedlaethol Cymru
- ymgeiswyr yn yr etholiad ar gyfer Comisiynwyr yr Heddlu a Throsedd
- asiantiaid etholiad
- asiantiaid pleidleisio
- swyddogion yr heddlu a swyddogion cymorth cymunedol sydd ar ddyletswydd yn yr orsaf bleidleisio
- cynrychiolwyr y Comisiwn Etholiadol
- arsylwyr achrededig
- y rhai o dan 18 oed sy'n dod gyda phleidleiswyr
- cymdeithion pleidleiswyr anabl

Gall asiant etholiad benodi is-asiantiaid i fod yn bresennol yn yr orsaf bleidleisio ar ei ran. Drwy gydol y llawlyfr hwn, mae unrhyw gyfeiriad at yr asiant etholiad yn cynnwys unrhyw is-asiantiaid sy'n gweithredu ar ei ran.

## Y Swyddog Canlyniadau a'i staff

Gall y Swyddog Canlyniadau a'i staff ymweld â'r orsaf yn ystod y dydd er mwyn cyflawni dyletswyddau fel cyflenwi mwy o gyfarpar, archwilio'r orsaf bleidleisio neu gasglu papurau pleidleisio drwy'r post y mae pleidleiswyr wedi'u cyflwyno yn yr orsaf bleidleisio.

## Ymgeiswyr, asiantiaid etholiad ac asiantiaid pleidleisio

Caiff yr holl ymgeiswyr sy'n ymladd yr etholiadau a'r asiantiaid etholiad fynd i mewn i orsaf bleidleisio ac aros yno ond rhaid iddynt beidio ag ymyrryd â'r pleidleisio na cheisio canfasio pleidleiswyr.

Gall asiantiaid pleidleisio gael eu penodi i weithio ar ran ymgeiswyr neu bleidiau gwleidyddol ar y diwrnod pleidleisio. Caiff asiantiaid pleidleisio fynd i mewn i orsaf bleidleisio ac aros yno ac arsylwi'r broses bleidleisio. Y prif reswm dros benodi asiantiaid pleidleisio yw canfod achosion o gambersonadu - hynny yw, pobl yn pleidleisio'n anghyfreithlon yn enw pleidleisiwr arall. Ni chaiff mwy nag un asiant pleidleisio fynd i mewn i orsaf bleidleisio ar yr un pryd ar ran yr un blaid wleidyddol neu ymgeisydd unigol. Bydd y Swyddog

Canlyniadau wedi hysbysu'r Swyddog Llywyddu ymlaen llaw os bydd unrhyw asiantiaid pleidleisio wedi'u penodi i fod yn bresennol yn yr orsaf bleidleisio.

Efallai yr hoffai asiantiaid pleidleisio nodi pwy sydd wedi pleidleisio ar eu copi eu hunain o'r gofrestr etholwyr, ond ni allant fynd â'r copi hwn o'r gofrestr allan o'r orsaf bleidleisio nes ar ôl i'r pleidleisio ddod i ben. Rhaid iddynt beidio ag ymyrryd â'r broses bleidleisio nac ymgyrchu na chanfasio pleidleiswyr yn yr orsaf bleidleisio. Os byddant yn gwisgo rhoséd neu fathodyn, dylai fod yn blaen ond gall ddangos enw ymgeisydd, plaid a/neu emblem. Cânt arsylwi'r broses o baratoi, agor a chau'r orsaf bleidleisio a gallant ychwanegu eu sêl at y blwch neu'r blychau pleidleisio ar ddiwedd y cyfnod pleidleisio (ond nid pan agorir y bleidlais). Yn ystod oriau pleidleisio, dylai'r asiantiaid pleidleisio sy'n bresennol gael eu gosod wrth fwrdd ar wahân sy'n ddigon agos iddynt arsylwi a chlywed yr hyn sy'n digwydd ond nad yw'n amharu ar gyfrinachedd y bleidlais.

## Swyddogion Heddlu ar ddyletswydd yn yr orsaf bleidleisio

Gall swyddogion heddlu a swyddogion cymorth cymunedol yr heddlu sydd ar ddyletswydd fod yn bresennol yn yr orsaf bleidleisio ar unrhyw adeg, er mai dyletswydd y Swyddog Llywyddu yw cadw trefn yn yr orsaf bleidleisio (gweler Atodiad 6 am wybodaeth am ddiogelwch yn yr orsaf bleidleisio).

## Cynrychiolwyr y Comisiwn Etholiadol ac arsylwyr achrededig

Caiff cynrychiolwyr y Comisiwn Etholiadol ac unigolion eraill sydd wedi'u hachredu drwy gynllun arsylwyr swyddogol y Comisiwn fod yn bresennol yn holl weithrediadau gorsafoedd pleidleisio. Nid oes angen iddynt roi gwybod ymlaen llaw ble y maent yn bwriadu arsylwi, ond rhaid i bob arsylwr gario prawf adnabod â llun ac ni ddylid caniatáu iddo arsylwi heb y prawf hwn (gweler enghreifftiau isod).

## Enghraifft o brawf adnabod a roddir i gynrychiolwyr y Comisiwn (pinc)

Y  
Comisiwn  
Etholiadol

Rebecca  
Brown



Cynrychiolydd y Comisiwn

Dylai Swyddogion Llywyddu hefyd gofnodi unrhyw ddigwyddiadau o'r fath a hysbysu'r Swyddog Canlyniadau cyn gynted â phosibl.

Ni chaiff unrhyw arsylwr a gafodd ei anfon o'r orsaf dan yr amgylchiadau uchod, ddod yn ôl i mewn i'r orsaf bleidleisio am weddill y bleidlais.

Os bydd gormod yn bresennol, caiff Swyddogion Llywyddu gyfyngu ar nifer yr arsylwyr achrededig (ond nid cynrychiolwyr y Comisiwn) sy'n bresennol mewn gorsaf bleidleisio am gyfnod penodedig - er enghraifft, am hanner awr neu awr. Fodd bynnag, mae'n bwysig nodi na chaiff unrhyw swyddog wahardd pob arsylwr o'r broses gyfan, dim ond cyfyngu ar nifer yr arsylwyr sy'n bresennol ar unrhyw adeg. Pan gymerir y fath gamau, dylid cofnodi hyn mewn cofnod gorsaf bleidleisio.

Dylai Swyddogion Llywyddu gofnodi manylion unrhyw arsylwyr achrededig neu gynrychiolwyr y Comisiwn a fydd yn bresennol yn eu gorsaf bleidleisio.

Mae arsylwi etholiadol yn rhan ddilys a gwerthfawr o'r broses etholiadol a dylid gofalu na chaiff arsylwyr eu rhwystro na'u hatal rhag arsylwi.

## Enghraifft o gerdyn adnabod a roddir i arsylwyr achrededig (arian)

Y  
Comisiwn  
Etholiadol

Jane  
Doe

Dilys o  
08/04/20XX

Dilys tan  
31/12/20XX



Sefydliad

Arsylwr achrededig

## Y rhai o dan 18 oed sy'n dod gyda phleidleiswyr

Caiff pobl ifanc o dan 18 oed fynd i mewn i'r orsaf bleidleisio gyda phleidleiswyr er mwyn arsylwi'r drefn bleidleisio. Gall Swyddogion Llywyddu gyfyngu ar nifer y rhai o dan 18 oed a all fod yn yr orsaf bleidleisio ar yr un pryd os credant fod eu presenoldeb yn amharu ar y gweithrediadau mewn unrhyw ffordd.

## Cymdeithion pleidleiswyr ag anableddau

Er y bydd llawer o bleidleiswyr anabl yn gallu pleidleisio heb gymorth, ni fydd pob un ohonynt, a gall y rhai hynny ddod â rhywun gyda nhw i fwrw eu pleidlais. Wrth ddelio â phleidleiswyr anabl sydd angen cymorth gan gydymaith, gwnewch yn siŵr eich bod yn siarad yn uniongyrchol â'r pleidleisiwr ac yn ymateb iddo, ac nid dim ond y cydymaith.

Gweler Atodiad 1 am ragor o fanylion, gan gynnwys pa gymorth y gall y Swyddog Llywyddu ei ddarparu.

Gellir bob amser gysylltu â'r swyddfa etholiadau i gadarnhau statws unigolion sy'n ceisio mynd i mewn i orsafoedd pleidleisio fel arsylwyr.

Mae cynrychiolwyr y Comisiwn ac arsylwyr achrededig yn cytuno i lynu wrth God ymddygiad, sy'n cynnwys cytundeb na fyddant yn ymyrryd ag unrhyw weithrediadau. Gall Swyddogion Llywyddu ofyn i arsylwyr (ond nid cynrychiolwyr y Comisiwn) adael yr orsaf bleidleisio, ond dim ond os byddant yn gwneud y canlynol:

- yn torri neu'n ceisio torri cyfrinachedd y bleidlais
- yn rhwystro'r broses bleidleisio yn fwriadol
- yn holi pleidleiswyr am eu dewisiadau pleidleisio

Os caiff arsylwr ei anfon o'r orsaf bleidleisio, rhaid i'r Swyddog Llywyddu roi nodyn i'r arsylwr yn nodi'r rhesymau pam y cafodd ei anfon o'r orsaf.

## Selio'r blwch neu'r blychau pleidleisio

Rhaid i'r Swyddog Llywyddu gau a selio'r blwch neu'r blychau pleidleisio ychydig funudau cyn 7am, ar ôl dangos i'r rhai sydd â hawl i fod yn bresennol eu bod yn wag. Os bydd y Swyddog Llywyddu wedi cael mwy nag un blwch pleidleisio, rhaid selio pob blwch pleidleisio cyn i'r bleidlais agor. Bydd y Swyddog Canlyniadau yn dweud wrthyhch p'un a ddefnyddir un blwch pleidleisio ar gyfer yr holl bapurau neu p'un a ddefnyddir blychau pleidleisio ar wahân i bob pleidlais. Os cewch unrhyw flychau ychwanegol, dylai'r rhain gael eu storio o'r golwg yn ddiogel hyd nes bod eu hangen.

Mae cynllun blychau pleidleisio, yn ogystal â sut i'w selio, yn amrywio. Pa bynnag ddull selio a ddefnyddir, gwnewch yn siŵr bod y blwch neu'r blychau pleidleisio wedi'u selio'n gywir. Ar y cam hwn, rhaid peidio â chaniatáu i ymgeiswyr, asiantiaid etholiad ac asiantiaid pleidleisio osod eu seliau ar y blwch neu'r blychau pleidleisio: dim ond ar ôl i'r pleidleisio ddod i ben y gallant osod eu seliau.

## Rhai tasgau munud olaf i'w cwblhau

Yn union cyn i'r orsaf bleidleisio agor, cymerwch rai munudau i wneud yn siŵr bod popeth yn barod. Gwnewch yn siŵr bod y papurau pleidleisio, y rhestr neu'r rhestrau rhifau cyfatebol, papurau pleidleisio a gyflwynwyd a dogfennau swyddogol eraill yn cael eu cadw'n ddiogel allan o gyrraedd pleidleiswyr. Dylai papurau pleidleisio a gyflwynwyd gael eu cadw ar wahân er mwyn sicrhau na chânt eu rhoi i unrhyw un mewn camgymeriad. Mae'n hawdd adnabod papurau pleidleisio a gyflwynwyd gan eu bod yn lliw gwahanol i'r papurau pleidleisio arferol. Bydd y Swyddog Canlyniadau yn rhoi gwybod i chi am liwiau'r holl bapurau pleidleisio sy'n cael eu defnyddio ar gyfer yr etholiadau hyn.

Mae Atodiad 5b yn cynnwys gwybodaeth am pryd y dylid rhoi papurau pleidleisio a gyflwynwyd.

Ni chaiff papurau pleidleisio eu darparu ar ffurf dalennau rhydd, yn hytrach mae'n debygol y cânt eu cyflenwi mewn llyfrau y gellir eu tynnu allan ohonynt wrth eu rhoi. Gwnewch yn siŵr bod y papurau pleidleisio yn dilyn y drefn rifol

gywir a bod y rhifau yn cyfateb i'r rhai sydd wedi'u hargraffu'n barod ar y rhestr neu'r rhestrau rhifau cyfatebol. Bydd hyn yn arbed problemau cyfrifo ar ddiwedd y cyfnod pleidleisio.

Gwnewch yn siŵr bod y marc adnabod unigryw i'w weld ar gefn y papurau pleidleisio ac os defnyddir marc swyddogol parod yn lle offeryn stampio, gwnewch yn siŵr bod hwn yno hefyd. Os defnyddir offeryn stampio, gwnewch yn siŵr ei fod yn gweithio.

Gwnewch yn siŵr bod y pensiliau/pennau wedi'u gosod yn sownd ar y bythau pleidleisio a bod pensiliau wedi'u miniogi.

## 5 Diwrnod pleidleisio: agor a chynnal y bleidlais

Mae'r bleidlais ar agor rhwng 7am a 10pm.

### Agor yr orsaf bleidleisio

Efallai y bydd nifer o etholwyr yn aros i'r orsaf bleidleisio agor. Cyfarchwch hwy a gwahoddwch hwy i ddod i mewn cyn gynted ag y bydd yn 7am. **Peidiwch â rhoi papurau pleidleisio i unrhyw un cyn 7am.**

### Crynodeb o'r drefn bleidleisio

I'r rhan fwyaf o bleidleiswyr a fydd yn dod i'r orsaf bleidleisio, bydd y broses bleidleisio yn syml. Dylid dilyn y drefn ganlynol yn yr amgylchiadau hyn:

#### Cam un - cadarnhau pwy yw'r pleidleisiwr

- Cyfarchwch yr etholwyr, gofynnwch iddynt gadarnhau eu henw a'u cyfeiriad, a gwnewch yn siŵr eu bod yn gymwys i bleidleisio yn yr etholiadau.
- Marciwch y gofrestr etholwyr yn erbyn rhif etholwr yr etholwr (ond nid drwyddo) drwy osod llinell syth yn erbyn cofnod y pleidleisiwr yn y gofrestr.
- Dywedwch rif ac enw'r etholwr.

#### Cam dau - rhoi'r papurau pleidleisio

- Ysgrifennwch y rhif etholwr (gan gynnwys llythyr(au) cyfeirio'r dosbarth pleidleisio os nad yw wedi'i argraffu'n barod) ar y rhestr neu'r rhestrau rhifau cyfatebol wrth ymyl rhifau'r papurau pleidleisio y byddwch yn eu rhoi.
- Gwnewch yn siŵr bod y papurau pleidleisio yn cynnwys marc swyddogol parod (e.e. cod bar neu ddyfrnod). Os nad ydynt, defnyddiwch yr offeryn stampio i stampio'r (mandyllu) marc swyddogol yng nghornel chwith uchaf y papur pleidleisio fel ei fod i'w weld ar ddwy ochr y papur.

- Plygwch y papurau pleidleisio, ac yna rhowch y papurau i'r pleidleisiwr heb eu plygu fel y gall weld yr holl ymgeiswyr a phleidiau sydd ar y papurau.

#### Cam tri - pleidleisio

- Mae'r pleidleisiwr yn marcio'r papurau pleidleisio ym mhreifatrwydd y bwth pleidleisio.
- Cyn i'r pleidleisiwr roi'r papurau pleidleisio yn y blwch neu'r blychau pleidleisio, dylai blygu'r papurau pleidleisio a dylai ddangos rhif y papurau pleidleisio a'r marc adnabod unigryw ar gefn y papurau pleidleisio i'r Swyddog Llywyddu.
- Dywedwch 'hwyl fawr' a diolch wrth y pleidleisiwr wrth iddo adael yr orsaf bleidleisio.

Mae'r atodiadau i'r llawlyfr hwn yn dangos beth i'w wneud os bydd rhywbeth anghyffredin yn digwydd, e.e. sefydlu hawl i bleidleisio, a delio â phleidleiswyr dienw, dirprwyon a dirprwyon brys. Dylai Swyddogion Llywyddu ddarllen yr adrannau hyn cyn y diwrnod pleidleisio er mwyn bod yn barod.

Cofiwch ddilyn pob cam o'r broses yn ofalus neu efallai y byddwch yn difreinio'r pleidleisiwr drwy amryfusedd.

#### Cam un - cadarnhau pwy yw'r pleidleisiwr

Mewn gorsaf bleidleisio â Swyddog Llywyddu a dim ond un Clerc Pleidleisio, dylai un person fod yn gyfrifol am y gofrestr etholwyr a'r papurau pleidleisio a dylai'r llall fod yn gyfrifol am sicrhau bod y rhif etholwr yn cael ei gofnodi'n gywir ar y rhestr neu'r rhestrau rhifau cyfatebol. Gall y Swyddog Canlyniadau roi arweiniad ar sut y dylid rhannu'r gwaith hwn a rhaid cydymffurfio â'r arweiniad hwn.



Os oes dau Clerc Pleidleisio, efallai yr hoffai'r Swyddog Llywyddu oruchwylio'r broses, gan ddelio ag etholwyr ac unrhyw amgylchiadau arbennig. Yn yr achos hwn, dylai'r ddau Clerc Pleidleisio rannu dyletswyddau a gallent gyfnewid rolau bob hyn a hyn, ar gyfarwyddyd y Swyddog Llywyddu.

Dylid cyfarch etholwyr wrth iddynt ddod at y bwrdd. Os oes dwy orsaf bleidleisio yn yr ystafell, gwnewch yn siŵr bod yr etholwyr yn mynd i'r bwrdd cywir. Dylai fod arwyddion i'w gweld sy'n rhestru'r strydoedd neu'r cyfeiriadau ar gyfer pob gorsaf a dylai staff yr orsaf bleidleisio fod wrth law i helpu etholwyr.

Mae'r rhan fwyaf o etholwyr yn dod â'u cerdyn pleidleisio gyda hwy i'w ddangos i'r Clerc Pleidleisio er nad yw hyn yn ofynnol i'r rhan fwyaf o bleidleiswyr. Cynigiwch roi'r cerdyn pleidleisio hwn yn ôl i'r etholwr: bydd yn eu helpu i roi gwybodaeth i rifwyr y tu allan os ydynt yn dymuno gwneud hynny. Os bydd yr etholwr yn gwrthod y cerdyn pleidleisio, dylai'r Clerc Pleidleisio waredu'r cerdyn yn ddiogel.

Oni bai bod gan etholwr gofnod dienw, rhaid i'r Clerc Pleidleisio wneud y canlynol:

- cadarnhau enw a chyfeiriad yr etholwr a gwneud yn siŵr ei fod yn y gofrestr etholwyr a'i fod yn gymwys i bleidleisio yn yr etholiadau
- tynnu llinell syth yn erbyn (ond nid drwy) ei gofnod yn y gofrestr etholwyr
- darllen allan enw'r etholwr, ei rif etholwr a chyfeirnod y dosbarth pleidleisio o'r gofrestr etholwyr (er mwyn rhwystro cambersonadu)

**Dim ond etholwyr â chofnodion dienw yn y gofrestr, a'u dirprwyon, sy'n gorfod cyflwyno eu cerdyn pleidleisio, neu eu cerdyn pleidleisio dirprwy, er mwyn pleidleisio.**

Y rheswm dros hyn yw bod etholwyr â chofnod dienw yn cael eu cofrestru heb eu henw na'u cyfeiriad er mwyn eu diogelu rhag niwed. Dychwelwch y cerdyn pleidleisio i unrhyw etholwr o'r fath ar ôl i chi farcio eu cofnod yn y gofrestr. Am eglurhad o'r drefn bleidleisio ar gyfer etholwyr dienw, gweler Atodiad 4.

## Enwau pwy sydd yn y gofrestr etholwyr?

Yn y rhan fwyaf o achosion, bydd y gofrestr etholwyr yn cynnwys enwau'r holl etholwyr a neilltuwyd i'r orsaf bleidleisio. Efallai y bydd rhai etholwyr wedi cofrestru'n ddiennw a byddant yn ymddangos heb eu henw na'u cyfeiriad. Bydd cofnodion y bobl hyn yn y gofrestr yn cynnwys eu rhif etholwr a'r llythren 'N', a byddant yn ymddangos ar ddiwedd y gofrestr o dan yr adran 'etholwyr eraill'.

Ynghyd â'u henw, mae cofnodion y rhan fwyaf o etholwyr ond yn cynnwys eu rhif etholwr a'u cyfeiriad. Mae'r etholwyr hyn yn gymwys i bleidleisio mewn unrhyw etholiad. Bydd gan rai etholwyr lythren neu ddyddiad o flaen eu henw hefyd. Mae'r llythrennau hyn yn dangos eu bod yn gymwys i bleidleisio mewn etholiadau penodol ac mae'r dyddiad yn nodi pryd y byddant yn cyrraedd oedran pleidleisio.

## Pwy all bleidleisio mewn etholiadau ar gyfer Cynulliad Cenedlaethol Cymru a Chomisiynwyr yr Heddlu a Throseddau?

- Etholwyr heb lythrennau na dyddiadau o flaen eu henw.
- Etholwyr â chofnod dienw sydd heb lythren wrth ymyl eu cofnod heblaw am y llythren 'N'.
- Etholwyr sy'n 18 oed neu'n hŷn (oni bai bod ganddynt hefyd lythren wrth ymyl eu cofnod sy'n dangos eu bod yn anghymwys) - mae'r ffigurau sy'n ymddangos cyn cofnod etholwr yn dangos ar ba ddyddiad y bydd yr etholwr hwnnw yn troi'n 18 oed.
- Etholwyr ag 'G' o flaen eu henw\* - dinasyddion o aelod-wladwriaethau'r Undeb Ewropeaidd (UE) (heblaw am y DU, Gweriniaeth Iwerddon, Cyprus a Malta) yw'r rhain a all bleidleisio mewn etholiadau i Gynulliad Cenedlaethol Cymru, etholiadau Comisiynwyr yr Heddlu a Throseddau ac etholiadau llywodraeth leol.
- Etholwyr â 'K' o flaen eu henw\* - dinasyddion o aelod-wladwriaethau'r Undeb Ewropeaidd (UE) (heblaw am y DU, Gweriniaeth Iwerddon, Cyprus a Malta) yw'r rhain a all bleidleisio mewn etholiadau i Gynulliad Cenedlaethol Cymru, etholiadau Comisiynwyr yr Heddlu a Throseddau, etholiadau Senedd Ewrop ac etholiadau llywodraeth leol.

- Etholwyr ag ‘L’ o flaen eu henw\* – etholwyr yw’r rhain a all eistedd yn Nhŷ’r Arglwyddi a phleidleisio mewn etholiadau i Gynulliad Cenedlaethol Cymru, etholiadau Comisiynwyr yr Heddlu a Throseddau, etholiadau Senedd Ewrop ac etholiadau llywodraeth leol.

## Pwy na all bleidleisio mewn etholiadau i Gynulliad Cenedlaethol Cymru a Chomisiynwyr yr Heddlu a Throseddau?

- Etholwyr â dyddiad geni wrth ymyl eu henw sy’n dangos na fyddant yn 18 oed nes ar ôl y diwrnod pleidleisio.
- Etholwyr ag ‘A’ o flaen eu henw\* - etholwyr yw’r rhain sydd wedi dewis pleidleisio drwy’r post ac felly ni allant bleidleisio yn bersonol yn yr orsaf bleidleisio.
- Etholwyr ag ‘E’ o flaen eu henw\* - arglwyddi’r deyrnas yw’r rhain sydd wedi’u cofrestru fel etholwyr o dramor ac sy’n gymwys i bleidleisio mewn etholiadau Senedd Ewrop yn unig.
- Etholwyr ag ‘F’ o flaen eu henw\* - etholwyr o dramor yw’r rhain a all bleidleisio mewn etholiadau Senedd y DU a Senedd Ewrop yn unig.

## Cam dau - rhoi’r papurau pleidleisio

Mae papurau pleidleisio wedi’u rhifo a dylent gyfateb i’r rhifau sydd wedi’u hargraffu’n barod ar y rhestr neu’r rhestrau rhifau cyfatebol. Rhaid rhoi papurau pleidleisio yn ôl eu trefn rifol gan ddechrau â’r rhif isaf yn y swp. Fel arall, bydd problemau’n codi ar ddiwedd y cyfnod pleidleisio wrth gwblhau cyfrifon y papurau pleidleisio.

Os bydd y gofrestr etholwyr yn dangos bod yr etholwr yn gymwys i bleidleisio yn yr etholiadau a’i fod wedi, os oes angen, ateb y cwestiynau rhagnodedig yn foddhaol (gweler Atodiad 5a am y cwestiynau rhagnodedig), yna rhaid rhoi papurau pleidleisio i’r pleidleisiwr.

Rhaid i’r Clerc Pleidleisio (neu’r Swyddog Llywyddu) â’r papurau pleidleisio wneud y canlynol:

- clustnodi’r papurau pleidleisio
- darllen allan rifau’r papurau pleidleisio
- sicrhau bod y papurau pleidleisio yn cynnwys y marc adnabod unigryw a’r marc swyddogol
- plygu’r papurau pleidleisio, ac yna eu rhoi i’r pleidleisiwr heb eu plygu fel y gall weld yr holl ymgeiswyr a phleidiau sydd ar y papurau

Rhaid i’r Clerc Pleidleisio (neu’r Swyddog Llywyddu) sydd â’r rhestr neu’r rhestrau rhifau cyfatebol ysgrifennu rhif etholwr y pleidleisiwr yn erbyn rhifau’r papurau pleidleisio sy’n cael eu rhoi, ar y rhestr neu’r rhestrau rhifau cyfatebol.

Rhaid cofnodi’r rhif etholwr ar y rhestr neu’r rhestrau rhifau cyfatebol bob amser. **Peidiwch ag ysgrifennu dim ar y papurau pleidleisio eu hunain.**

## Beth sy’n digwydd os nad yw’r papur pleidleisio yn cynnwys y marc adnabod unigryw?

Rhaid bod marc adnabod unigryw ar gefn pob papur pleidleisio. Gellir defnyddio mathau gwahanol o farciau, er enghraifft, cod bar wedi’i argraffu neu gyfres o lythrennau a rhifau. Dylai’r Swyddog Canlyniadau, neu ei staff, hysbysu Swyddogion Llywyddu yn ystod y sesiwn hyfforddi pa fath o farc adnabod unigryw a ddefnyddir.

Os na fydd y marc adnabod unigryw ar unrhyw un o’r papurau pleidleisio, dylai’r Swyddog Llywyddu hysbysu’r swyddfa etholiadau ar unwaith. Os mai dim ond rhai papurau sydd heb y marc, dylai’r Swyddog Llywyddu ond roi’r papurau pleidleisio hynny sy’n cynnwys y marc adnabod unigryw, a dylai hefyd hysbysu’r swyddfa etholiadau am y sefyllfa.

## Beth sy’n digwydd os nad yw’r papur pleidleisio yn cynnwys y marc swyddogol?

Efallai y bydd y marc swyddogol wedi’i argraffu’n barod ar y papurau pleidleisio, neu efallai y bydd angen defnyddio offeryn stampio i fandyllu’r papurau pleidleisio cyn eu rhoi. Bydd y

\* Ar gyfer etholwr sydd wedi’i gofrestru’n ddiennw, byddai unrhyw lythrennau yn ymddangos cyn y llythyren ‘N’, gan na chaiff enwau’r etholwyr hyn eu cynnwys yn y gofrestr etholwyr.

Swyddog Canlyniadau yn rhoi gwybod beth fydd y marc swyddogol yn ystod y sesiwn hyfforddi. **Rhaid** bod marc swyddogol ar bob papur pleidleisio. Caiff unrhyw bapur pleidleisio nad yw'n cynnwys y marc swyddogol ei wrthod yn ystod y cyfrif.

Os dylai'r papurau pleidleisio gynnwys marc swyddogol sydd wedi'i argraffu'n barod fel y nododd y Swyddog Canlyniadau, ond nad yw'r marc hwnnw yn bresennol, dylai'r Swyddog Llywyddu gysylltu â'r Swyddog Canlyniadau. Efallai y bydd y Swyddog Canlyniadau wedi darparu offeryn stampio i'w ddefnyddio mewn argyfwng. Dylid defnyddio hwn i stampio cornel chwith uchaf y papurau pleidleisio fel bod y marc i'w weld ar ddwy ochr y papur. Os nad yw'r offeryn stampio yn gweithio, dylai'r Swyddog Llywyddu gysylltu â'r Swyddog Canlyniadau i gael rhagor o gyngor a byrffyrrio fel y nodir isod.

### Beth sy'n digwydd os nad yw'r offeryn stampio yn gweithio?

Os yw'r Swyddog Canlyniadau wedi penderfynu defnyddio offeryn stampio ond nad yw wedi darparu un neu wedi darparu un diffygiol, dylid hysbysu'r Swyddog Canlyniadau ar unwaith a dylid dyfeisio dull stampio byrffyr. Er enghraifft, defnyddio pin bawd i fandyllu'r papur pleidleisio sawl gwaith cyn ei roi. Dylai'r Swyddog Llywyddu gofnodi'r marc byrffyr a nodi rhifau'r papurau pleidleisio cyntaf ac olaf a gafodd eu rhoi a'u stampio yn y modd hwn. Dylid cyflwyno'r cofnod hwn gyda'r cyfrifon papurau pleidleisio yn y ganolfan gyfrif.

### Cam tri - pleidleisio

Rhaid i bleidleiswyr farcio'r papurau pleidleisio ym mhreifatrwydd y bwth pleidleisio ac yna ailblygu'r papurau pleidleisio er mwyn atal pobl rhag gweld eu pleidlais. Dylai pleidleiswyr ddangos rhif y papur pleidleisio a'r marc adnabod unigryw ar gefn y papurau pleidleisio i'r Swyddog Llywyddu neu'r Clerc Pleidleisio cyn iddynt eu rhoi yn y blwch neu'r blychau pleidleisio.

### Beth yw'r drefn os bydd pleidleisiwr yn gwneud camgymeriad ac yn difetha papur pleidleisio?

**Peidiwch â rhoi papurau pleidleisio a gyflwynwyd.**

Weithiau, mae etholwyr yn gwneud camgymeriadau, e.e. drwy roi marc yn erbyn yr ymgeisydd neu'r blaid 'anghywir'. Rhaid i'r Swyddog Llywyddu fynd â'r papur neu'r papurau pleidleisio a ddifethwyd ac ysgrifennu 'wedi canslo' arnynt cyn eu rhoi yn yr amlen a ddarperir. **Peidiwch â rhoi'r papur neu'r papurau pleidleisio a ddifethwyd yn y blwch neu'r blychau pleidleisio.** Unwaith y bydd papur pleidleisio a ddifethwyd wedi'i roi yn y blwch pleidleisio, ni ellir rhoi papur pleidleisio arall yn ei le.

Rhowch bapur pleidleisio arall i'r pleidleisiwr am bob papur pleidleisio a ddifethwyd. Peidiwch ag anghofio ysgrifennu'r rhif etholwr yn erbyn rhif y papur neu'r papurau pleidleisio newydd ar y rhestr neu'r rhestrau rhifau cyfatebol ac ysgrifennu 'wedi canslo' wrth ymyl y rhif etholwr ar gyfer y papur neu'r papurau pleidleisio a ganslwyd. Rhaid i'r Swyddog Llywyddu hefyd gofio sicrhau bod unrhyw bapurau pleidleisio newydd a roddir yn cynnwys y marc swyddogol.

Ar ddiwedd y cyfnod pleidleisio, rhaid i'r Swyddog Llywyddu gyfrif ac yna gofnodi nifer y papurau pleidleisio a ddifethwyd ar y cyfrifon papurau pleidleisio.

### Beth os bydd yr etholwr yn gwrthod papur pleidleisio penodol cyn iddo gael ei drosglwyddo?

Os bydd etholwr yn gwrthod un o'r papurau pleidleisio cyn iddo gael ei drosglwyddo, dylai'r Swyddog Llywyddu roi'r papur pleidleisio y gofynnwyd amdano a marcio'r gofrestr etholwyr yn briodol, gan nodi pa bapur neu bapurau pleidleisio a roddwyd. Yna dylid cofnodi rhif yr etholwr ar y rhestr neu'r rhestrau rhifau cyfatebol.

Gall y pleidleisiwr ddychwelyd i'r orsaf bleidleisio yn ddiweddarach yn ystod y diwrnod pleidleisio i ofyn am y papur neu'r papurau pleidleisio a wrthododd yn flaenorol, felly mae'n bwysig dilyn y drefn hon. Os bydd yr etholwr yn dychwelyd i'r orsaf bleidleisio yn ddiweddarach yn y dydd, dylid marcio'r rhestr rhifau cyfatebol ond dim ond y papur neu'r papurau pleidleisio a wrthodwyd yn flaenorol y dylid eu trosglwyddo i'r pleidleisiwr. Dylai'r Swyddog Llywyddu farcio'r gofrestr etholwyr i nodi pa bapurau pleidleisio a roddwyd yn awr i'r etholwr hwnnw.

## Beth os bydd papur pleidleisio eisoes wedi'i drosglwyddo a bod yr etholwr yn penderfynu wedyn nad yw ei eisiau?

Ni ellir canslo papur pleidleisio ar ôl iddo gael ei drosglwyddo i'r etholwr (oni bai ei fod wedi'i ddifetha). Felly, dylai'r Swyddog Llywyddu geisio darbwyllo'r etholwr i roi'r papur pleidleisio gwag yn y blwch pleidleisio priodol.

Os bydd y pleidleisiwr yn gwrthod, dylai'r Swyddog Llywyddu fynd â'r papur pleidleisio a'i gadw'n ddiogel ar wahân i'r papurau pleidleisio eraill a nodi ar y cyfrif papurau pleidleisio priodol y cafodd y papur ei roi ond na chafodd ei ddefnyddio. Ni ddylai'r Swyddog Llywyddu roi'r papur pleidleisio hwn i rywun arall; fodd bynnag, caiff roi'r papur pleidleisio hwn i'r etholwr y rhoddwyd y papur iddo'n wreiddiol os bydd yn dychwelyd yn ddiweddarach ac yn gofyn amdano.

## Rhoi cymorth cyffredinol i bleidleiswyr

Mae dyletswydd ar staff pleidleisio i gynorthwyo pleidleiswyr yn ystod y broses bleidleisio. Cofiwch, cwsmeriaid yw pleidleiswyr: cyfarchwch hwy â gwên ac ystyriwch unrhyw anghenion arbennig a all fod ganddynt.

Peidiwch byth â bod yn swta, yn rhagfarnllyd nac yn nawddoglyd. Peidiwch â digio na chynhyrfu, hyd yn oed dan bwysau. Gwrandewch yn ofalus os bydd rhywun yn gofyn cwestiwn i chi. Os na allwch ateb cwestiynau neu bryderon pleidleisiwr, cyfeiriwch hwy at y Swyddog Canlyniadau.

Wrth roi cymorth cyffredinol, rhaid i staff gorsafoedd pleidleisio ofalu peidio ag arwain pleidleiswyr i fwrw eu pleidlais dros ymgeisydd neu blaid benodol, na chynnig barn ar unrhyw ymgeisydd neu blaid.

Mae nifer o gyfarwyddiadau ysgrifenedig ar gael i bleidleiswyr yn yr orsaf bleidleisio. Yn gyntaf, mae'r cyfarwyddiadau ar y papurau pleidleisio eu hunain. Hefyd, mae'r posteri 'Sut i bleidleisio yn yr etholiadau hyn' a'r hysbysiad a arddangosir ym mhob bwth pleidleisio. Os bydd unrhyw bleidleisiwr yn gofyn am gymorth, mewn rhai amgylchiadau, gall fod yn ddefnyddiol darllen y cyfarwyddiadau hyn iddynt.

Yn ogystal, gall y Swyddog Canlyniadau fod wedi darparu cyfarwyddiadau neu arweiniad mewn ieithoedd neu fformatau eraill yn dibynnu ar ofynion y gymuned. Dylai'r Swyddog Llywyddu wybod pa adnoddau sydd ar gael a'u darparu yn ôl yr angen.

Efallai y bydd y cyfarwyddiadau yn aneglur o hyd i rai pleidleiswyr. Er enghraifft, efallai y byddant yn gofyn i chi ddangos eu hoff ymgeisydd neu blaid iddynt neu'n gofyn ble y dylent osod eu marc ar y papurau pleidleisio. Dylai'r Swyddog Llywyddu ddarllen allan y cyfarwyddiadau sydd ar frig y papurau pleidleisio a manylion yr ymgeiswyr a'r pleidiau yn y drefn y maent yn ymddangos ar y papurau pleidleisio.

Mae gweithdrefnau arbennig i'w dilyn wrth gynorthwyo pleidleiswyr anabl a disgrifir y rhain yn Atodiad 1.

## Tystysgrifau cyflogaeth

Efallai y bydd rhai aelodau o staff gorsafoedd pleidleisio wedi cael tystysgrif gyflogaeth. Caiff y tystysgrifau hyn eu llofnodi gan y Swyddog Canlyniadau, gan alluogi staff i bleidleisio mewn gorsaf bleidleisio arall yn yr etholaeth yn hytrach na'r un a bennwyd iddynt. Yn yr un modd, gall swyddog heddlu gyflwyno tystysgrifau o'r fath, wedi'u llofnodi gan arolygydd (neu rywun uwch). Yn yr achos hwn, bydd y Swyddog Llywyddu yn rhoi papurau pleidleisio ac yna'n canslo'r tystysgrifau ac yn eu gosod yn yr amlen a ddarperir.

## Pleidleisiau post

Swyddogion Llywyddu sy'n gyfrifol am dderbyn unrhyw bleidleisiau post (neu unrhyw ran o bleidlais bost, h.y. papur(au) pleidleisio drwy'r post neu'r datganiad pleidleisio drwy'r post) a gyflwynir yn yr orsaf bleidleisio. I gael rhagor o fanylion am y drefn pleidleisio drwy'r post, gweler Atodiad 3.

## Cynnal a chadw'r man pleidleisio

Dylai'r Swyddog Llywyddu archwilio'r man pleidleisio yn rheolaidd, gan gynnwys cadw llygad am grwpiau mawr o etholwyr yn aros i bleidleisio, a sicrhau y gall pleidleiswyr fynd i mewn i'r orsaf yn ddirwystr bob amser.

- Archwiliwch arwyddion a hysbysiadau ac atgyweiriwch unrhyw rai sydd wedi'u difetha neu eu difrodi neu gosodwch rai newydd yn eu lle.
- Sicrhewch nad oes rhwystr wrth y fynedfa i'r orsaf bleidleisio, gan gynnwys unrhyw rampiau.
- Os defnyddir rampiau dros dro, sicrhewch eu bod wedi'u gosod yn sOWNd ac nad ydynt yn dod yn rhydd yn ystod y dydd.
- Cyfarwyddwch unrhyw un sy'n ymgyrchu yn yr orsaf bleidleisio neu gerllaw i roi'r gorau iddi.
- Gwardwch unrhyw ddeunydd ymgyrchu y gellid bod wedi'i adael yn yr orsaf bleidleisio.
- Sicrhewch fod digon o olau i bleidleiswyr yn y bythau pleidleisio.
- Sicrhewch fod y pennau/pensiliau yn y bythau o hyd a miniogwch bensiliau os oes angen.
- Sicrhewch nad oes unrhyw beth wedi'i adael yn y bythau, gan gynnwys papurau pleidleisio neu wybodaeth am blaid neu ymgeisydd penodol.
- Gwiriwch seliau/clo'r blwch pleidleisio.
- Ysgwydwch y blwch pleidleisio neu defnyddiwch bren mesur neu grynodiadur blwch pleidleisio i wthio'r papurau pleidleisio i lawr os yw'r blwch yn edrych yn llawn.
- Cadwch yr orsaf bleidleisio, gan gynnwys unrhyw goridorau sy'n arwain at yr orsaf bleidleisio, yn lân, yn daclus ac yn rhydd rhag unrhyw beryglon.
- Os sylwch ar unrhyw giwiau'n datblygu, dilynwch gyfarwyddiadau'r Swyddog Canlyniadau ar sut i ddelio â hwy.

## 6 Diwedd y pleidleisio

Rhaid i'r pleidleisio orffen am 10pm, ond os bydd unrhyw etholwyr cymwys yn eu gorsaf bleidleisio neu'n ciwio y tu allan i'r orsaf er mwyn pleidleisio am 10pm, rhaid caniatáu iddynt fwrw eu pleidlais.

Os bydd person yn yr orsaf bleidleisio neu'n ciwio y tu allan i'r orsaf bleidleisio erbyn 10pm er mwyn dychwelyd pleidlais bost, gallant wneud hynny ar ôl 10pm.

### Gweithdrefnau

- Archwiliwch y man pleidleisio, nid dim ond yn union cyn diwedd y pleidleisio, ond yn rheolaidd tan ddiwedd y pleidleisio a chymerwch gamau i sicrhau, cyn belled ag sy'n bosibl, y bydd modd rhoi papurau pleidleisio i bob etholwr sy'n aros erbyn 10pm. Os nad yw hynny'n bosibl, cymerwch gamau i sicrhau y bydd pob un ohonynt y tu mewn i'r orsaf bleidleisio neu'n ciwio y tu allan i'r orsaf bleidleisio er mwyn pleidleisio erbyn yr amser hwnnw. Hysbyswch y swyddfa etholiadau ar unwaith os bydd ciw wedi ffurfio'n barod neu'n datblygu yn ystod y cyfnod cyn i'r pleidleisio ddod i ben.
- Os oes mwy nag un orsaf bleidleisio yn yr adeilad, sicrhewch fod pawb sy'n aros i bleidleisio yn yr orsaf bleidleisio gywir ar gyfer eu cyfeiriad.
- Gwnewch yn siŵr nad oes neb yn ymuno â'r ciw ar ôl 10pm.
- Os oes ciw am 10pm ac os oes lle yn yr orsaf bleidleisio i'r holl etholwyr yn y ciw, gofynnwch i'r etholwyr symud i mewn i'r orsaf bleidleisio a chaewch y drws y tu ôl i'r etholwyr diwethaf yn y ciw.
- Os nad oes digon o le yn yr orsaf bleidleisio i'r holl etholwyr yn y ciw, dylai aelod o dîm yr orsaf bleidleisio ddynodi diwedd y ciw drwy sefyll y tu ôl i'r etholwr diwethaf yn y ciw.
- Eglurwch i unrhyw un sy'n cyrraedd ar ôl 10pm ac sy'n ceisio ymuno â'r ciw bod y pleidleisio wedi dod i ben a'i bod yn anghyfreithlon rhoi papurau pleidleisio iddynt. Mae'n bosibl y caiff person sy'n dynodi diwedd y ciw neu staff y tu mewn i'r orsaf bleidleisio eu herio gan etholwr sydd am bleidleisio er iddo gyrraedd ar ôl 10pm. Ni ellir rhoi papurau pleidleisio i etholwyr o'r fath o dan unrhyw amgylchiadau. Mae canllawiau cyffredinol i'ch helpu i sicrhau diogelwch yn yr orsaf bleidleisio ac o'i chwmpas ar gael yn Atodiad 6.
- Rhaid peidio â rhoi papurau pleidleisio na derbyn pleidleisiau drwy'r post gan unrhyw un nad ydynt yn aros i bleidleisio naill ai yn yr orsaf bleidleisio ei hun, neu mewn ciw y tu allan i'r orsaf am 10pm.
- Rhaid caniatáu i bawb sydd wedi derbyn papurau pleidleisio, fwrw eu pleidlais.

Yn ogystal â staff etholiadau, caniateir i'r canlynol fod yn bresennol ar ddiwedd y pleidleisio:

- yr ymgeiswyr
- asiantiaid etholiad
- asiantiaid pleidleisio
- swyddogion yr heddlu a swyddogion cymorth cymunedol sydd ar ddyletswydd yn yr orsaf bleidleisio
- cynrychiolwyr y Comisiwn Etholiadol
- arsylwyr achrededig

Ar ôl i'r pleidleisio ddod i ben ac ar ôl i'r person diwethaf bleidleisio, rhaid i'r Swyddog Llywyddu selio twll y blwch neu'r blychau pleidleisio. Gall unrhyw ymgeisydd, asiant etholiad neu asiant pleidleisio sy'n bresennol osod eu sêl arno hefyd.

Yn y cyfamser, dylai'r Clerc Pleidleisio dynnu'r holl arwyddion i lawr a thacluso'r ystafell. Os cânt gyfarwyddyd i wneud hynny, efallai y bydd angen i staff gorsafoedd pleidleisio ddatgysylltu dodrefn yr orsaf bleidleisio ac adfer yr ystafell i'w chyflwr gwreiddiol. Byddwch yn ofalus wrth symud eitemau trwm (gweler Atodiad 9 am ganllawiau ar iechyd a diogelwch).

Caiff ymgeiswyr, asiantiaid etholiad ac asiantiaid pleidleisio fod yn bresennol hefyd wrth gwblhau'r gwaith papur ac wrth selio'r pecynnau dogfennau amrywiol fel y disgrifir isod.

## Cwblhau'r gwaith papur

Rhaid i'r Swyddog Llywyddu lenwi'r holl ffurflenni swyddogol. **Byddwch yn ofalus wrth lenwi'r gwaith papur. Mae cywirdeb yn llawer pwysicach na chyflymder.**

Mae'n ddigon posibl na fyddai wedi bod angen defnyddio rhai o'r ffurflenni swyddogol yn ystod y dydd; efallai na roddwyd unrhyw bapurau pleidleisio a gyflwynwyd ac efallai na chafodd unrhyw bapurau pleidleisio eu difetha. Os felly, rhaid i chi lenwi'r ffurflenni o hyd, gan roi 'nil' lle bo angen.

## Rhestr wirio o'r ffurflenni swyddogol i'w llenwi gan y Swyddog Llywyddu

- cyfrif(on) papurau pleidleisio
- y rhestr o bleidleiswyr ag anabledau a gynorthwywyd gan gymdeithion
- y rhestr o bleidleisiau a farciwyd gan y Swyddog Llywyddu
- datganiad o nifer y pleidleiswyr y cafodd eu pleidleisiau eu marcio gan y Swyddog Llywyddu
- datganiad o nifer y pleidleisiau post a gyflwynwyd yn yr orsaf bleidleisio
- y rhestr pleidleisiau a gyflwynwyd

Mae'n haws cwblhau'r gwaith papur os caiff yr holl ffurflenni swyddogol eu gosod allan yn barod gyda'u hamlenni cyfatebol. Rhestrir y cynnwys ar flaen pob un o'r amlenni swyddogol. Llenwch gymaint o'r ffurflenni a'r amlenni ag sy'n bosibl yn ystod y dydd, ymhell cyn diwedd y cyfnod pleidleisio. Cofiwch gwblhau'r holl waith papur hyd yn oed os nad yw'n ymddangos bod unrhyw beth i'w gofnodi.

Ar adegau, er enghraifft, mae'n bosibl na fydd unrhyw bapurau pleidleisio a gyflwynwyd wedi'u rhoi neu na fydd etholwyr wedi difetha unrhyw bapurau pleidleisio. Yn yr achosion hyn, dylai'r Swyddog Llywyddu lenwi adrannau perthnasol y cyfrifon papurau pleidleisio o hyd.

## Rhestr wirio o becynnau ac amlenni swyddogol a'u cynnwys

- cyfrifon papurau pleidleisio – cadwch y rhain gyda'r blwch neu'r blychau pleidleisio
- y pecyn sy'n cynnwys y pleidleisiau post a gyflwynir yn yr orsaf bleidleisio - cadwch hwn gyda'r blwch neu'r blychau pleidleisio
- papurau pleidleisio a ddifethwyd a phapurau pleidleisio heb eu defnyddio (rhai cyffredin a rhai a gyflwynwyd) - os nad oes digon o le, lapiwch yr amlen o'u cwmpas a'u clymu'n dynn gyda llinyn neu fandiau elastig
- y papurau pleidleisio a gyflwynwyd
- y copi wedi'i farcio o'r gofrestr etholwyr (gan gynnwys unrhyw hysbysiadau wedi'u marcio fel y disgrifir yn Atodiad 2) a'r rhestr dirprwyon
- y rhestr neu'r rhestrau rhifau cyfatebol cyflawn
- y tystysgrifau cyflogaeth
- y rhestr pleidleisiau a gyflwynwyd, y rhestr o bleidleiswyr ag anabledau a gynorthwywyd gan gymdeithion, y rhestr o bleidleisiau a farciwyd gan y Swyddog Llywyddu, y datganiad o nifer y pleidleiswyr y cafodd eu pleidleisiau eu marcio gan y Swyddog Llywyddu a'r datganiadau a wnaed gan gymdeithion pleidleiswyr ag anabledau.

## Y cyfrifon papurau pleidleisio

Y cyfrifon papurau pleidleisio yw'r rhan bwysicaf o'r holl waith papur a dylid llenwi'r rhain gyntaf a'u cwblhau'n ofalus. Mewn sawl achos, bydd rhan gyntaf y cyfrifon papurau pleidleisio wedi'i chwblhau ymlaen llaw gan y Swyddog Canlyniadau. Dyletswydd y Swyddog Llywyddu yw cwblhau gweddill y ffurflen.

Mae'r cyfrifon papurau pleidleisio yn cysoni nifer y papurau pleidleisio a ddosbarthwyd gan y Swyddog Llywyddu. Cofiwch gyfrif nifer y papurau pleidleisio a roddir yn unol â'r rhestr neu'r rhestrau rhifau cyfatebol a nodwch hyn ar y cyfrifon papurau pleidleisio. Mae'r ffurflen yn dibynnu ar rifau cyfresol y papurau pleidleisio a

dyna pam ei bod mor bwysig rhoi papurau pleidleisio yn eu trefn rifol fel sydd wedi'i hargraffu'n barod ar y rhestr neu'r rhestrau rhifau cyfatebol.

Rhaid dosbarthu'r cyfrifon papurau pleidleisio a'r pecyn sy'n cynnwys y pleidleisiau post gyda'r blwch neu'r blychau pleidleisio a dogfennaeth eraill i'r ganolfan dilysu a chyfrif pleidleisiau fel y cyfarwyddir - peidiwch â'u colli na'u gosod mewn camgymeriad mewn amlen arall neu gyda deunyddiau eraill yr etholiad oherwydd gallai hyn beri problemau ac oedi yn ystod y gwaith dilysu a chyfrif.

### Gweddill y gwaith papur

Yna dylai Swyddogion Llywyddu droi at weddill y gwaith papur. Llenwch a llofnodwch y ffurflenni eraill ar y rhestr wirio (gweler uchod). Peidiwch ag anghofio nodi 'nil' ar y ffurflenni hynny os na fu'n rhaid eu defnyddio yn ystod y dydd.

### Pacio deunyddiau yn yr orsaf bleidleisio

Yn eu trefn, paciwch y deunyddiau yn eu hamlenni a'u pecynnau swyddogol. Rhaid gosod y rhestr neu'r rhestrau rhifau cyfatebol a'r papurau pleidleisio heb eu defnyddio ar wahân yn yr amlenni priodol. Dylai pleidleisiau post (neu rannau o bleidleisiau post) a gyflwynwyd yn yr orsaf bleidleisio gael eu cadw ar wahân hefyd oherwydd bydd angen y rhain yn fuan yn y ganolfan dilysu a chyfrif pleidleisiau.

Byddwch wedi cael nifer o sachau, bagiau neu focsys i gludo'r gwaith papur a deunyddiau eraill yr etholiad yn ôl i'r ganolfan dilysu a chyfrif pleidleisiau. Gwnewch yn siŵr bod yr eitemau yn cael eu gosod yn y cynhwysydd priodol.

### Cludo deunyddiau'r etholiad i'r ganolfan dilysu a chyfrif pleidleisiau

Rhaid dosbarthu'r blwch neu'r blychau pleidleisio, y cyfrifon papurau pleidleisio, yr amlen pleidleisiau post, sachau neu fagiau sy'n cynnwys yr amlenni swyddogol, a phapurau a deunyddiau eraill yr etholiad i'r ganolfan dilysu a chyfrif pleidleisiau.

Bydd y Swyddog Canlyniadau wedi rhoi cyfarwyddiadau ar gludo'r blwch neu'r blychau pleidleisio a deunyddiau'r orsaf bleidleisio.

Os caiff yr eitemau eu dosbarthu gan y Swyddog Llywyddu, bydd y Swyddog Canlyniadau wedi rhoi cyfarwyddiadau ar leoliad y ganolfan dilysu a chyfrif pleidleisiau a pha fynedfa i'w defnyddio. Efallai y bydd gofyn i un o'r Clercod Pleidleisio gynorthwyo'r Swyddog Llywyddu os bydd gormod o bethau i un person eu cario. **Ewch i'r ganolfan dilysu a chyfrif pleidleisiau yn syth, heb oedi.** Dylai Swyddogion Llywyddu gysylltu â'r Swyddog Canlyniadau ar unwaith os bydd unrhyw broblemau'n codi a allai beri iddynt gyrraedd y ganolfan dilysu a chyfrif pleidleisiau yn hwyr.

Weithiau, efallai y gwneir trefniadau eraill i gludo'r blwch neu'r blychau pleidleisio a deunyddiau'r etholiad. Efallai y bydd y Swyddog Canlyniadau yn trefnu bod y deunyddiau'n cael eu casglu o'r orsaf bleidleisio a'u cludo i'r ganolfan gyfrif.

**Peidiwch byth â gadael y blwch neu'r blychau pleidleisio heb neb i ofalu amdanynt a sicrhewch mai dim ond i aelodau o staff y Swyddog Canlyniadau y trosglwyddir y blwch neu'r blychau pleidleisio.**

Yn olaf, cyn gadael yr orsaf bleidleisio, gwnewch yn siŵr eich bod yn gwaredu unrhyw wastraff yn briodol ac yn gadael y safle'n ddaclus. Sicrhewch fod unrhyw allweddi yn cael eu dychwelyd i'r person priodol.



# Atodiad 1

## Materion yn ymwneud â chydraddoldeb

### Etholwyr anabl ac etholiadau

Nod y canllawiau canlynol yw helpu i sicrhau bod gan bawb fynediad cyfartal i bleidleisio.

Rhaid i staff gorsafoedd pleidleisio sicrhau nad ydynt yn cynnig safon is o wasanaeth i bleidleiswyr anabl na phleidleiswyr eraill. Rhaid gwneud addasiadau rhesymol i arferion a gweithdrefnau fel na chaiff pobl ag amrywiaeth o anableddau eu rhoi dan anfantais mewn unrhyw ffordd.

Bydd y Swyddog Canlyniadau yn gwneud trefniadau i sicrhau bod gan bleidleiswyr anabl, i'r graddau sy'n bosibl, yr un mynediad i'r broses etholiadol ag unrhyw un arall. Fodd bynnag, gall yr arferion a fabwysiadir gan Swyddogion Llywyddu ar y diwrnod pleidleisio helpu i wneud gwahaniaeth hefyd:

- Os darperir lleoedd parcio ceir i bobl anabl, gwnewch yn siŵr eu bod ar gael at y diben hwnnw drwy gydol y bleidlais.
- Beth bynnag, os yw'n bosibl, cadwch lleoedd parcio sy'n agos i fynedfa'r orsaf pleidleisio yn rhydd i bobl anabl.
- Sicrhewch fod arwyddion da i ddynodi unrhyw fynedfa amgen i bobl anabl a gwnewch yn siŵr ei bod yn rhydd rhag rhwystrau drwy'r dydd.
- Defnyddiwch ramp pwrpasol os oes un ar gael, ond gwnewch yn siŵr ei fod yn addas. Sicrhewch fod rampiau yn aros yn sownd yn eu lle drwy'r dydd.
- Gall cadw drysau dwbl ar agor helpu i sicrhau mynediad da i bawb; fodd bynnag, gwnewch yn siŵr nad yw'r rhain yn ddrysau tân.
- A yw'r matiau drws yn lefel â'r llawr? Os nad ydynt, a ellir eu symud oddi yno os gallent fod yn beryglus?

- Gwnewch yn siŵr fod sedd ar gael i unrhyw etholwr a all fod am orffwys - yn ddelfrydol, dylai fod cymysgedd o seddi gyda breichiau a hebddynt.

### Cymorth i etholwyr sy'n methu â mynd i mewn i'r orsaf pleidleisio

Yn ddelfrydol, bydd eich gorsaf pleidleisio mewn adeilad cwbl hygyrch. Yn anffodus, yn ymarferol, nid felly y mae yn aml ac mewn rhai ardaloedd ni fydd llawer o adeiladau hygyrch ar gael i'w defnyddio fel gorsafoedd pleidleisio.

Os na all etholwr ag anabledd corfforol fynd i mewn i'r orsaf pleidleisio, gall y Swyddog Llywyddu, ar ôl hysbysu unrhyw asiantiaid sy'n bresennol, fynd â'r papurau pleidleisio i'r etholwr. Ar ôl i'r etholwr farcio'r papurau pleidleisio, rhaid i'r Swyddog Llywyddu osod y papurau wedi'u plygu yn y blwch neu'r blychau pleidleisio ar unwaith. Mae'n hanfodol cynnal cyfrinachedd pleidleisio bob amser. Rhaid peidio â gadael y blwch neu'r blychau pleidleisio heb neb i ofalu amdanynt na'u symud o'r orsaf pleidleisio ar unrhyw adeg.

### Pleidleiswyr anabl

Efallai y bydd rhai pleidleiswyr yn gofyn am gymorth y Swyddog Llywyddu i farcio'r papurau pleidleisio ar eu rhan. Os yw'r pleidleisiwr yn gwybod dros bwy yr hoffai bleidleisio, gall gyfarwyddo'r Swyddog Llywyddu, ym mhreifatrwydd y bwth pleidleisio, i farcio'r papurau pleidleisio ar ei ran yn briodol. Sicrhewch na all unrhyw bleidleisiwr arall glywed dewisiadau'r pleidleisiwr anabl rydych yn ei gynorthwyo. Os yn bosibl, dewiswch ran o'r orsaf pleidleisio lle na all unrhyw un arall glywed sgwrs rhwng dau berson sy'n siarad â'u lleisiau arferol.

Weithiau, efallai y bydd y pleidleisiwr yn ansicr ynghylch sut i bleidleisio. Os felly, dylai'r Swyddog Llywyddu ddarllen allan y cyfarwyddiadau sydd ar frig y papurau pleidleisio a manylion yr ymgeiswyr a'r pleidiau yn y drefn y maent yn ymddangos ar y papurau pleidleisio.

Ar ôl i'r etholwr benderfynu, rhaid i'r Swyddog Llywyddu farcio'r papurau pleidleisio yn briodol. Os bydd ymgeiswyr, asiantiaid etholiad neu asiantiaid pleidleisio yn bresennol, dylid eu gwahodd i wrando ar y Swyddog Llywyddu a'i arsylwi, fel y gallant gadarnhau bod y papurau pleidleisio yn cael eu marcio yn unol â dymuniadau'r etholwr.

Os bydd yn rhaid i'r Swyddog Llywyddu farcio papurau pleidleisio ar ran etholwr, rhaid nodi enw'r pleidleisiwr ar y ffurflen swyddogol 'Rhestr o bleidleisiau a farciwyd gan y Swyddog Llywyddu'. Ar ddiwedd y pleidleisio, rhaid i'r Swyddog Llywyddu hefyd lenwi'r 'Datganiad o nifer y pleidleiswyr y cafodd eu pleidleisiau eu marcio gan y Swyddog Llywyddu'.

Fel arall, gall pleidleisiwr anabl gael cymorth gan gydymaith, gyda chaniatâd y Swyddog Llywyddu, y mae'n rhaid iddo fodloni ei hun y byddai anabledau'r pleidleisiwr yn ei atal rhag pleidleisio'n annibynnol.

Rhaid i gydymaith y pleidleisiwr anabl fod naill ai'n berthynas agos (tad, mam, brawd, chwaer, gŵr/gwraig, partner sifil, mab neu ferch - os ydynt yn 18 oed neu'n hŷn) neu'n etholwr cymwys. Dylai'r pleidleisiwr ofyn am ganiatâd y Swyddog Llywyddu i gael cymorth gan ei gydymaith.

Mae'n ofynnol yn ôl y gyfraith i'r cydymaith, nid y pleidleisiwr, gwblhau datganiad syml, 'Datganiad i'w wneud gan gydymaith pleidleisiwr ag anabledau'. Mae'n ddefnyddiol i'r Swyddog Llywyddu lenwi'r datganiad ar ran y cydymaith a gofyn iddo fwrw golwg dros y wybodaeth a llofnodi'r ddogfen.

Rhaid i'r Swyddog Llywyddu sicrhau ei fod yn egluro'r broses yn glir i'r etholwr a'i gydymaith.

Rhaid i'r Swyddog Llywyddu gofnodi enw a rhif etholwr y pleidleisiwr, yn ogystal ag enw a chyfeiriad y cydymaith, ar y ffurflen 'Rhestr o

bleidleiswyr ag anabledau a gynorthwywyd gan gymdeithion'.

## Pobl ddall neu rannol ddall

Gall etholwr dall neu rannol ddall bleidleisio heb gymorth gan ddefnyddio'r templed a ddarperir. Rhaid i holl aelodau o staff gorsafoedd pleidleisio wybod sut i ddefnyddio'r templed hwn a gallu egluro sut i'w ddefnyddio i bleidleiswyr dall neu rannol ddall. Gwnewch yn siŵr bod y templed wedi'i gysylltu'n sOWNd i'r papur pleidleisio a bod y pleidleisiwr yn hyderus i'w ddefnyddio. Dylai'r pleidleisiwr wneud y canlynol:

- codi'r ffenestr(i) dethol/dethol
- marcio'r papur pleidleisio perthnasol
- cau'r ffenestr(i)
- datgysylltu'r templed oddi wrth y papur pleidleisio
- plygu a gosod y papur pleidleisio yn y blwch pleidleisio
- dychwelyd y templed i'r Swyddog Llywyddu

Mae angen dilyn y broses hon ar gyfer pob papur pleidleisio a roddir.

Sicrhewch fod fersiynau print bras o bob un o'r papurau pleidleisio yn cael eu harddangos mewn ardal â digon o olau lle gall etholwyr eu gweld yn hawdd cyn cael eu papurau pleidleisio. Dylid sicrhau bod y copïau llaw mwy o faint o bob un o'r papurau pleidleisio, gyda'r gair 'sAMPL' arnynt, ar gael i bleidleiswyr hefyd.

Efallai y bydd pleidleiswyr dall neu rannol ddall yn gofyn am gymorth gan y Swyddog Llywyddu neu gymdeithion cymwys.

Gwnewch y canlynol:

- rhowch gyfarwyddiadau manwl er mwyn helpu pleidleiswyr o'r fath i ganfod eu ffordd
- tywyswch y pleidleisiwr yn unol â'i gyfarwyddyd (mae'n well gan y rhan fwyaf o bobl ddall neu rannol ddall ddal braich y cynorthwydd)

Peidiwch â gwneud y canlynol:

- cymryd yn ganiataol bod angen help - gofynnwch yn gyntaf bob amser

- tynnu sylw cŵn tywys drwy eu mwyrtho a pheidiwch â chymryd y tennyn
- cyffwrdd â'r pleidleisiwr heb ofyn yn gyntaf a fyddai'n hoffi i chi ei dywys

## Pobl fyddar-ddall

Mae sribedi coch ar ffon wen neu harnais coch a gwyn ar gi tywys yn dangos bod gan y person nam ar ei olwg a'i glyw.

## Pobl fyddar

Gall colled clyw amrywio o golled ysgafn i golled ddwys. Bydd rhai pobl â cholled clyw yn defnyddio Saesneg llafar ac efallai y byddant yn dibynnu ar ddarllen gwefusau i gyfathrebu. Efallai mai iaith Arwyddion Prydain fydd iaith gyntaf rhai eraill, ond mae'n bosibl y byddant hefyd yn darllen gwefusau. Efallai y bydd person â cholled clyw yn gwisgo cymhorthion clyw, ond nid yw'r rhain yn adfer ei glyw yn llawn.

Os oes dolen sain wedi'i gosod mewn gorsaf bleidleisio, dylid ei defnyddio lle bynnag y bo modd er mwyn galluogi pleidleiswyr sydd â cholled clyw i gymryd rhan yn y broses etholiadol.

Gwnewch y canlynol:

- ceisiwch ennyn sylw'r person byddar cyn siarad
- rhowch dap ysgafn ar eu hysgwydd neu codwch eich llaw arnynt
- wynebwch y person rydych yn siarad ag ef
- siaradwch yn glir, heb fod yn rhy araf, a defnyddiwch symudiadau gwefus arferol - defnyddiwch fynegiant wyneb ac ystumiau naturiol
- byddwch yn amyneddgar ac ailadroddwch bethau os oes angen
- defnyddiwch iaith glir
- os nad oes rhywun yn deall yr hyn rydych wedi'i ddweud, ceisiwch ei ddweud mewn ffordd arall
- cadwch gyswllt llygad
- byddwch yn barod i ysgrifennu rhywbeth i lawr os nad yw'r person yn deall yr hyn rydych yn ei ddweud o hyd
- dewch o hyd i le addas i siarad, â digon o olau, heb sŵn nac ymyriadau

Peidiwch â gwneud y canlynol:

- gweiddi - mae'n ystumio eich wyneb a'ch llais ac mae'n edrych yn fygythiol
- rhoi unrhyw beth yn eich ceg
- cuddio eich ceg
- siarad yn rhy gyflym
- siarad yn rhy araf na gorliwio patrymau gwefus
- troi i ffwrdd nac edrych i lawr
- siarad â golau llachar y tu ôl i chi - bydd hyn yn cysgodi eich wyneb
- dal unrhyw beth yn eich llaw os byddwch yn defnyddio ystumiau
- rhoi'r ffidil yn y to os na fydd y person byddar yn deall ar unwaith

## Galluedd meddyliol, anabledd a phleidleisio

Mae'n bosibl y bydd yn ymddangos i'r Swyddog Llywyddu bod gan berson sy'n gwneud cais am bapurau pleidleisio ryw fath o broblem iechyd meddwl neu anabledd dysgu.

Ni ellir gwrthod rhoi papurau pleidleisio i berson sydd wedi'i gofrestru'n etholwr neu sydd wedi'i gofnodi ar y rhestr dirprwyon, hynny yw ei wahardd rhag pleidleisio, ar sail analluedd meddyliol.

Ym mhob achos, dylai'r Swyddog Llywyddu geisio sicrhau bod person yn cael cymorth priodol i'w alluogi i fwrw ei bleidlais. Er enghraifft, efallai y bydd angen i'r Swyddog Llywyddu egluro'r broses bleidleisio i'r etholwr neu efallai y bydd yn gofyn am gymorth cydymaith.

## Atodiad 2

# Delio â phroblemau yn y gofrestr etholwyr

### Oedran - hawl i bleidleisio

Mae'n drosedd i bersonau o dan 18 oed bleidleisio yn yr etholiadau hyn, boed hynny ar eu pen eu hunain neu gyda rhywun arall. Os yw'n amlwg bod rhywun o dan 18 oed, dylid ei rybuddio y bydd yn euog o drosedd os bydd yn pleidleisio yn yr etholiadau. Rhaid i'r Swyddog Llywyddu ofyn y cwestiynau rhagnodedig a rhaid i'r person eu hateb heb gymorth (gweler Atodiad 5a am wybodaeth am y cwestiynau rhagnodedig). Os bydd y person yn ateb y cwestiynau'n foddhaol, rhaid rhoi papurau pleidleisio iddynt. Ni ellir gofyn unrhyw gwestiynau eraill. Dylid nodi enw a chyfeiriad y pleidleisiwr ynghyd ag unrhyw fanylion eraill, gan gynnwys amser y digwyddiad a manylion unrhyw berson a oedd gyda'r pleidleisiwr. Yna, dylid hysbysu'r Swyddog Canlyniadau.

### Enwau wedi'u camsillafu a phleidleiswyr sydd wedi newid eu henw

Weithiau, bydd enw etholwr wedi'i gamsillafu neu bydd yr enw wedi newid yn gyfreithlon ers iddo wneud cais i fod yn y gofrestr, e.e. drwy briodas.

Gofynnwch y cwestiynau rhagnodedig i'r etholwr (gweler Atodiad 5a). Os bydd y pleidleisiwr yn eu hateb yn foddhaol, rhaid gadael iddo bleidleisio, a dylai'r Swyddog Llywyddu nodi'r gwall a'i drosglwyddo i'r Swyddog Cofrestru Etholiadol.

Os bydd yr etholwr yn mynnu ei fod am i'r gwall gael ei ddiwygio cyn pleidleisio, dylai'r Swyddog Llywyddu gysylltu â'r swyddfa etholiadau am gyngor neu, fel arall, dylai gyfeirio'r pleidleisiwr at y Swyddog Cofrestru Etholiadol.

### Etholwyr eraill

Mae'r pennawd 'Etholwyr eraill' yn ymddangos ar ddiwedd rhai cofrestr. Nid yw'r etholwyr yn yr adran hon, sy'n cynnwys etholwyr o'r lluoedd arfog a'r rhai sydd wedi cofrestru drwy ddatganiad o gysylltiad lleol, yn bodloni'r amod cymhwysu preswyl mwyach ond gallant bleidleisio o hyd (yn dibynnu ar hawl). Mae'n annhebygol y bydd etholwyr o'r lluoedd arfog wedi cael cerdyn pleidleisio. Fodd bynnag, bydd cardiau pleidleisio wedi'u hanfon at yr holl etholwyr dienw y bydd angen iddynt, yn wahanol i bleidleiswyr cyffredin, gyflwyno eu cerdyn pleidleisio er mwyn pleidleisio yn yr orsaf pleidleisio (gweler Atodiad 4).

### Person nad yw'n ymddangos yn y gofrestr etholwyr

Fel arfer, bydd y gofrestr etholwyr yn cynnwys pawb sydd â hawl i bleidleisio yn yr orsaf pleidleisio honno. Os na fydd enw person yn ymddangos ar gofrestr yr orsaf pleidleisio, efallai nad yw'r person wedi'i gofrestru. Fodd bynnag, mae'n bosibl bod gwall wedi digwydd.

### Gwallau clercol yn y gofrestr

Os bydd y Swyddog Cofrestru Etholiadol yn darganfod y cyflwynwyd cais wedi'i gwblhau'n gywir ac mai dim ond drwy wall clercol y cafodd y person ei hepgor o'r gofrestr, bydd y Swyddog Cofrestru Etholiadol yn cywiro'r gwall hyd at 9pm ar y diwrnod pleidleisio ac yn gwneud trefniadau i alluogi'r person i bleidleisio tan ddiwedd y cyfnod pleidleisio am 10pm. Efallai y caiff y gwall ei ddarganfod gan y Swyddog Cofrestru Etholiadol naill ai cyn neu ar y diwrnod pleidleisio neu gan pleidleisiwr neu ddirprwy yn yr orsaf pleidleisio.

## Gwallau clercol a nodir gan y Swyddog Cofrestru Etholiadol cyn y diwrnod pleidleisio

---

Os caiff gwall ei nodi cyn y diwrnod pleidleisio ond ar ôl i'r gofrestr gael ei llunio ar gyfer yr orsaf pleidleisio, bydd y Swyddog Cofrestru Etholiadol wedi darparu 'hysbysiad' ar wahân, yn cynnwys unrhyw ychwanegiadau neu ddiwygiadau, i gyd-fynd â'r gofrestr arferol. Rhaid marcio'r hysbysiad hwn yn lle'r gofrestr ond, mae'r holl weithdrefnau eraill yr un fath, gan gynnwys selio unrhyw hysbysiad o'r fath gyda'r gofrestr ar ddiwedd y pleidleisio.

## Gwallau clercol a nodir gan y Swyddog Llywyddu ar y diwrnod pleidleisio

---

Os bydd rhywun nad yw'n ymddangos yn y gofrestr (na'r hysbysiad) yn dod i'r orsaf pleidleisio ac yn mynnu ei fod wedi gwneud cais i gofrestru, dylai'r Swyddog Llywyddu gyfeirio'r mater at y Swyddog Cofrestru Etholiadol ar unwaith.

## Gwallau clercol a nodir gan y Swyddog Cofrestru Etholiadol ar y diwrnod pleidleisio

---

Os gwelir y cafodd cais wedi'i gwblhau'n gywir ei gyflwyno ac mai dim ond drwy wall clercol y cafodd y person ei hepgor o'r gofrestr, rhaid cywiro'r gwall a bydd y Swyddog Cofrestru Etholiadol yn hysbysu'r Swyddog Llywyddu (naill ai'n ysgrifenedig neu ar lafar, e.e. dros y ffôn).

## Gweithdrefn i ganiatáu i berson pleidleisio ar ôl cywiro gwall clercol ar y diwrnod pleidleisio

---

Rhoddir cyfarwyddiadau ar sut y caiff y wybodaeth ei throsglwyddo i'r Swyddog Llywyddu yn y sesiwn hyfforddi.

Os caiff yr hysbysiad ei roi ar lafar, rhaid i'r Swyddog Llywyddu wneud cofnod ysgrifenedig o enw a rhif yr etholwr a marcio'r cofnod hwn wrth roi papurau pleidleisio yn y ffordd arferol. Efallai y bydd Swyddogion Llywyddu wedi cael ffurflen arbennig at y diben hwn.

Os caiff yr hysbysiad ei roi yn ysgrifenedig, rhaid marcio'r hysbysiad hwnnw fel pe bai'n rhan o'r gofrestr, neu rhaid i'r Swyddog Llywyddu ysgrifennu a marcio enw a rhif yr etholwr ar

ffurflen arbennig a ddarperir at y diben. Bydd Swyddogion Llywyddu wedi cael cyfarwyddiadau penodol yn ystod eu sesiwn frifio. Unwaith y bydd enw a rhif yr etholwr wedi'u marcio, rhaid rhoi papurau pleidleisio yn y ffordd arferol.

Rhaid selio'r hysbysiad a farciwyd neu'r cofnod ysgrifenedig a farciwyd gyda'r gofrestr ar ddiwedd y pleidleisio.

## Unrhyw berson arall nad yw'n ymddangos yn y gofrestr etholwyr

Rhaid peidio â chaniatáu i unrhyw un arall nad yw'n ymddangos yn y gofrestr etholwyr (na'r hysbysiad) ar gyfer yr orsaf pleidleisio honno, pleidleisio. Efallai bod y person wedi'i gofrestru i pleidleisio mewn dosbarth pleidleisio arall. Os bydd angen mwy o help ar yr etholwr, cyfeiriwch ef at y swyddfa etholiadau.

# Atodiad 3

## Gweithdrefn ar gyfer pleidleiswyr post a dirprwyon

### Pleidleiswyr post

Bydd rhai etholwyr wedi gwneud cais i bleidleisio drwy'r post yn yr etholiadau. Er mwyn dangos eu bod yn bleidleiswyr post, bydd y llythyren 'A' yn ymddangos yn erbyn enwau'r rhai sydd wedi dewis pleidleisio drwy'r post, yn y gofrestr etholwyr a ddefnyddir yn yr orsaf bleidleisio. Bydd yr enwau a'r cyfeiriadau yr anfonwyd y papurau pleidleisio drwy'r post atynt yn ymddangos ar y rhestr pleidleiswyr post. Ni chaniateir i'r etholwyr hyn bleidleisio yn bersonol yn yr orsaf bleidleisio, hyd yn oed os byddant yn dweud nad ydynt wedi cael eu papurau pleidleisio drwy'r post.

Fodd bynnag, gall y pleidleisiwr neu rywun ar ei ran fynd â phleidleisiau post wedi'u cwblhau i unrhyw orsaf bleidleisio yn yr ardal etholiadol. Bydd y Swyddog Canlyniadau wedi rhoi cyfarwyddiadau i chi ar ba bleidleisiau post y gellir eu dychwelyd i'ch gorsaf bleidleisio. Dylai'r bleidlais bost fod mewn amlen wedi'i selio a rhaid i'r Swyddog Llywyddu ei gosod, heb ei hagar, yn y pecyn a ddarperir.

Rhaid cadw'r pecyn yn ddiogel bob amser. Rhaid ei drosglwyddo i unrhyw aelod o staff a benodir i gasglu pleidleisiau post a gyflwynir yn yr orsaf bleidleisio yn unol â chyfarwyddiadau'r Swyddog Canlyniadau, neu rhaid ei ddsbarthu i'r ganolfan dilysu a chyfrif pleidleisiau ar ddiwedd y pleidleisio.

**Rhaid peidio â rhoi pleidleisiau post yn y blwch neu'r blychau pleidleisio.**

### Casglu pleidleisiau post o orsafoedd pleidleisio

Gall y Swyddog Canlyniadau drefnu bod pleidleisiau post yn cael eu casglu o orsafoedd pleidleisio yn ystod y diwrnod pleidleisio. Os caiff pleidleisiau post eu casglu o'r orsaf bleidleisio, dylid eu rhoi mewn pecyn a ddylai

gael ei selio. Gall asiantiaid pleidleisio, ymgeiswyr ac asiantiaid etholiad osod eu seliau eu hunain ar y pecyn hefyd, os ydynt yn dymuno.

### Beth sy'n digwydd os bydd rhywun wedi'i restru'n bleidleisiwr post (neu'n ddirprwy sy'n pleidleisio drwy'r post) ond ei fod yn honni nad yw wedi gwneud cais am bleidlais bost?

Weithiau, bydd etholwr neu ddirprwy penodedig yn gofyn am bapurau pleidleisio ond yn darganfod ei fod wedi'i farcio yn y gofrestr etholwyr fel pleidleisiwr post.

Dylai'r Swyddog Llywyddu edrych ar y cofnod yn y gofrestr etholwyr i gadarnhau bod yr etholwr neu'r dirprwy wedi'i farcio yn bleidleisiwr post. Dylai'r Swyddog Llywyddu egluro'r amgylchiadau i'r etholwr neu'r dirprwy ac os bydd yn mynnu nad yw wedi gwneud cais am bleidlais bost, dylid dilyn y gweithdrefnau canlynol.

Os yw'r etholwr neu'r dirprwy wedi cael ei bleidlais bost, dylid ei hysbysu i ddychwelyd y bleidlais hon yn y ffordd arferol, gan gofio y gellir mynd â phapurau pleidleisio drwy'r post sydd wedi'u cwblhau i'r orsaf bleidleisio.

Ni ellir rhoi papurau pleidleisio cyffredin yn yr orsaf bleidleisio i etholwyr na dirprwyon y cofnodwyd bod pleidlais bost wedi'i hanfon atynt. Fodd bynnag, caiff etholwr neu ddirprwy sy'n honni nad yw byth wedi gwneud cais am bleidlais bost ond sydd wedi'i restru'n bleidleisiwr post, gael papurau pleidleisio a gyflwynwyd yn yr orsaf bleidleisio ar unrhyw adeg.

Fel arall, nes 5pm ar y diwrnod pleidleisio, gall y Swyddog Canlyniadau perthnasol roi pecyn pleidleisio drwy'r post newydd iddynt. Dylai'r Swyddog Llywyddu gyfeirio'r etholwr neu'r

dirprwy at y swyddfa etholiadau am gyngor ar y weithdrefn hon.

Os yw cyn 5pm ond na all yr etholwr neu'r dirprwy wneud trefniadau i gael pleidlais bost newydd neu os nad yw'n dymuno gwneud hynny, dylai'r Swyddog Llywyddu ddilyn y drefn ar gyfer rhoi papurau pleidleisio a gyflwynwyd yn lle hynny (gweler Atodiad 5b).

Ar ôl 5pm, ni ellir rhoi pecyn pleidleisio drwy'r post newydd i'r etholwr neu'r dirprwy, felly dim ond papurau pleidleisio a gyflwynwyd y gall y Swyddog Llywyddu eu rhoi.

Cyn rhoi papurau pleidleisio a gyflwynwyd, rhaid i'r Swyddog Llywyddu ofyn y cwestiynau rhagnodedig priodol (gweler Atodiad 5a).

Os bydd yr etholwr neu'r dirprwy yn ateb y cwestiynau rhagnodedig yn foddhaol, rhaid i'r Swyddog Llywyddu roi papurau pleidleisio a gyflwynwyd - rhaid peidio â rhoi papurau pleidleisio cyffredin i'r etholwr na'r dirprwy.

Ym mhob achos, dylai'r Swyddog Llywyddu wneud cofnod o fanylion yr etholwr yn unol â chyfarwyddyd y Swyddog Canlyniadau. Dylai hefyd hysbysu'r etholwr i gysylltu â'r Swyddog Cofrestru Etholiadol, yn enwedig os hoffai ganslo'r trefniadau pleidleisio drwy'r post ar gyfer etholiadau a refferenda yn y dyfodol.

**Beth sy'n digwydd os nad yw etholwr (neu ddirprwy sy'n pleidleisio drwy'r post) wedi cael ei bapurau pleidleisio drwy'r post, neu ei fod wedi eu colli neu eu difetha?**

Ni ellir rhoi papurau pleidleisio drwy'r post newydd yn lle set arall o bapurau pleidleisio drwy'r post yn yr orsaf bleidleisio. Os bydd etholwr (neu ddirprwy sy'n pleidleisio drwy'r post) yn datgan ei fod wedi gwneud cais am bleidlais bost ond nad yw wedi cael ei bapurau pleidleisio drwy'r post neu ei fod wedi eu colli neu eu difetha, dylid ei hysbysu i wneud cais i'r Swyddog Canlyniadau am bapurau newydd, cyn belled â'i fod yn gwneud hynny cyn 5pm ar y diwrnod pleidleisio. Gellir rhoi papurau newydd hyd at yr amser hwnnw a dylai'r Swyddog Llywyddu gyfeirio'r etholwr neu'r dirprwy at y swyddfa etholiadau am gyngor ar y drefn hon.

Hyd yn oed os bydd etholwyr ond wedi colli neu ddifetha un o'u papurau pleidleisio, dylid eu

hysbysu i wneud cais am set newydd i'w defnyddio yn lle'r pecyn pleidleisio drwy'r post cyfan. Bydd y Swyddog Canlyniadau yn rhoi rhagor o gyfarwyddiadau yn ystod y sesiwn frifio.

Os bydd etholwr (neu ddirprwy sy'n pleidleisio drwy'r post) yn cyrraedd ar ôl 5pm ar y diwrnod pleidleisio ac yn datgan ei fod wedi colli neu ddifetha ei bapurau pleidleisio drwy'r post neu nad yw wedi'u derbyn, gellir rhoi papurau pleidleisio a gyflwynwyd iddo os bydd yn ateb y cwestiynau rhagnodedig yn foddhaol (gweler Atodiad 5a).

Ni ellir rhoi papurau pleidleisio a gyflwynwyd i etholwr o'r fath (neu ddirprwy o'r fath sy'n pleidleisio drwy'r post) cyn 5pm.

## Dirprwyon

Bydd rhai etholwyr wedi penodi dirprwy i bleidleisio ar eu rhan. Er hynny, gall etholwyr bleidleisio yn bersonol ar yr amod eu bod yn gwneud hynny cyn y dirprwy ac nad yw'r dirprwy wedi gwneud cais i bleidleisio drwy'r post. Edrychwch ar y gofrestr etholwyr i weld a yw'r etholwr eisoes wedi pleidleisio cyn dechrau rhoi'r weithdrefn ganlynol ar waith. Efallai y bydd y llythyren 'P' yn ymddangos yn y gofrestr etholwyr yn erbyn enwau etholwyr sydd wedi gwneud cais i bleidleisio drwy ddirprwy.

Os bydd y dirprwy yn pleidleisio ei hun hefyd, dylai wneud hynny cyn pleidleisio fel dirprwy.

Yn gyntaf, gofynnwch am enw a chyfeiriad yr etholwr ac edrychwch i weld a yw wedi'i gynnwys ar y rhestr dirprwyon. Gofynnwch am enw a chyfeiriad y dirprwy a thynnwch linell ar y rhestr dirprwyon i ddangos bod y dirprwy wedi pleidleisio.

Yna rhaid marcio cofnod yr etholwr yn y gofrestr yn y ffordd arferol a dylid darllen enw a rhif yr etholwr allan yn uchel.

Rhaid i'r Swyddog Llywyddu neu'r Clerc Pleidleisio sy'n gyfrifol am roi papurau pleidleisio ysgrifennu rhif etholwr yr etholwr (nid y dirprwy) ar y rhestr neu'r rhestrau rhifau cyfatebol wrth ymyl rhifau'r papurau pleidleisio priodol er mwyn cofnodi bod y papurau pleidleisio wedi'u rhoi.

Cofiwch mai dim ond i etholwyr sy'n gymwys i bleidleisio yn yr etholiadau y gellir rhoi papurau pleidleisio. Os oes llythyren yn ymddangos o flaen cofnod yr etholwr yn y gofrestr etholwyr sy'n golygu nad oes hawl ganddo bleidleisio yn yr etholiadau, ni all y dirprwy fwrw pleidlais ar ei ran.

### Gweithdrefn ar gyfer rhoi papurau pleidleisio i ddirprwyon sy'n pleidleisio ar ran etholwyr â chofnodion dienw yn y gofrestr

---

Er mwyn eu diogelu rhag niwed, bydd rhai etholwyr wedi'u cofrestru heb eu henw na'u cyfeiriad - hynny yw, bydd ganddynt gofnod dienw yn y gofrestr (gweler Atodiad 4). Efallai y bydd etholwyr â chofnod dienw wedi penodi dirprwy i bleidleisio ar eu rhan. Os felly, gofynnwch am eu cerdyn pleidleisio: rhaid i ddirprwyon sy'n dymuno pleidleisio ar ran etholwr dienw gyflwyno eu cerdyn pleidleisio dirprwy swyddogol ac ni allant bleidleisio fel dirprwy hebddo. Yn lle gofyn am enw a chyfeiriad yr etholwr a galw allan enw'r etholwr, dim ond ei rif etholwr y dylid gofyn amdano a'i alw allan.

Cofiwch mai dim ond i etholwyr sy'n gymwys i bleidleisio yn yr etholiadau y gellir rhoi papurau pleidleisio. Os oes llythyren yn ymddangos o flaen cofnod yr etholwr yn y gofrestr etholwyr sy'n golygu nad oes hawl ganddo bleidleisio yn yr etholiadau, ni all y dirprwy fwrw pleidlais ar ei ran.

### Cymhwysedd i bleidleisio fel dirprwy

---

Ni chaiff person bleidleisio fel dirprwy ar ran mwy na dau etholwr mewn unrhyw etholaeth neu ranbarth yn yr un etholiad i Gynulliad Cenedlaethol Cymru. Hefyd, ni chaiff person bleidleisio fel dirprwy ar ran mwy na dau etholwr mewn unrhyw ardal bleidleisio yn yr un etholiad ar gyfer Comisiynydd yr Heddlu a Throsedd.

Caiff person ond weithredu fel dirprwy i fwy na dau etholwr os yw'n aelod agos o deulu'r etholwyr (h.y. tad, mam, brawd, chwaer, gŵr/gwraig, partner sifil, mab, merch, mam-gu/tad-cu neu ŵyr/wyres). Os bydd person sydd wedi'i benodi i weithredu fel dirprwy i fwy nag un etholwr yn gwneud cais i arfer hawl yr etholwr i bleidleisio, dim ond papurau pleidleisio un etholwr ar y tro y dylid eu rhoi i'r dirprwy.

Gellir herio dirprwyon yn yr un ffordd ag y gellir herio pleidleiswyr cyffredin os amheuir eu bod yn cambersonadu. Os bydd hyn yn digwydd, gofynnwch y cwestiynau rhagnodedig perthnasol (gweler Atodiad 5a).

### Beth os bydd yr etholwr yn dod i bleidleisio yn lle'r dirprwy?

---

Mae hawl gan etholwr sydd wedi penodi dirprwy gael ei bapurau pleidleisio os bydd yn gwneud cais amdanynt yn bersonol, ond dim ond os bydd yn gwneud hynny cyn i'r papurau pleidleisio gael eu rhoi ar ei ran i'r dirprwy. Rhaid peidio â marcio'r rhestr dirprwyon os bydd hyn yn digwydd, ond rhaid marcio cofnod yr etholwr yn y gofrestr etholwyr. Os bydd y dirprwy yn dod yn ddiweddarach, ni ddylid gadael iddo bleidleisio fel dirprwy ar ran y pleidleisiwr, ond os bydd yn mynnu nad yw'r etholwr wedi pleidleisio eto a bod y cwestiynau rhagnodedig yn cael eu gofyn, yna gellir rhoi papurau pleidleisio a gyflwynwyd.

Os yw'r dirprwy wedi gwneud cais i bleidleisio drwy'r post, ni ellir rhoi papurau pleidleisio i'r etholwr. Bydd y llythyren 'A' yn ymddangos yn erbyn enw'r etholwr yn y gofrestr etholwyr a bydd enw'r dirprwy a'r cyfeiriad yr anfonwyd y bleidlais bost iddo yn ymddangos ar y rhestr dirprwyon sy'n pleidleisio drwy'r post.

### Beth sy'n digwydd os bydd yn ymddangos bod rhywun arall wedi pleidleisio fel dirprwy?

---

Dylai'r Swyddog Llywyddu ddilyn y drefn ar gyfer rhoi papurau pleidleisio a gyflwynwyd i ddirprwyon os yw cofnod dirprwy yn y rhestr dirprwyon a chofnod yr etholwr yn y gofrestr etholwyr eisoes wedi'u marcio (gweler Atodiad 5b).

Dim ond ar ôl gofyn y cwestiynau rhagnodedig i ddirprwyon y dylai'r Swyddog Llywyddu roi papurau pleidleisio a gyflwynwyd (gweler Atodiad 5b).

### Dirprwyon brys

---

Gall etholwyr benodi dirprwy hyd at 5pm ar y diwrnod pleidleisio yn achos pob math o argyfwng meddygol neu os ydynt wedi cael eu galw i ffwrdd yn annisgwyl oherwydd eu gwaith neu eu gwasanaeth. Os bydd rhywun yn



gwneud cais ar y diwrnod pleidleisio, bydd y Swyddog Cofrestru Etholiadol a'r Swyddog Canlyniadau yn sicrhau bod holl staff yr orsaf bleidleisio yn cael gwybod am y drefn briodol i'w dilyn.

Os bydd y Swyddog Cofrestru Etholiadol yn caniatáu cais brys am bleidlais drwy ddirprwy ar y diwrnod pleidleisio, caiff y Swyddog Llywyddu perthnasol ei hysbysu am y penderfyniad yn ysgrifenedig neu dros y ffôn.

Yna dylai'r Swyddog Llywyddu nodi enw, cyfeiriad a rhif yr etholwr ac atodi'r wybodaeth hon i'r rhestr dirprwyon. Efallai bod ffurflen wag ar ddiwedd y rhestr dirprwyon at y diben hwnnw.

Unwaith y bydd penderfyniad y Swyddog Cofrestru Etholiadol i ganiatáu cais brys am bleidlais drwy ddirprwy yn hysbys, rhaid i'r Swyddog Llywyddu roi'r papurau pleidleisio yn y ffordd arferol. Dylai cofnod ysgrifenedig y Swyddog Cofrestru Etholiadol (os yw ar gael) neu nodyn y Swyddog Llywyddu gael ei farcio i ddangos bod y dirprwy wedi pleidleisio ar ran yr etholwr.

# Atodiad 4

## Etholwyr â chofnod dienw yn y gofrestr

Er mwyn eu diogelu rhag niwed, bydd rhai etholwyr wedi'u cofrestru heb eu henw na'u cyfeiriad. Bydd ganddynt gofnod dienw yn y gofrestr, fel y'i gelwir, a fydd yn cynnwys eu rhif etholwr a'r llythyren 'N'. Efallai y bydd gan rai o'r etholwyr hyn lythrennau eraill sy'n gosod amodau ar eu cymhwysedd i bleidleisio mewn etholiadau penodol (gweler Pennod 5 am fanylion).

Os bydd cofrestr yn cynnwys cofnodion dienw, byddant yn ymddangos ar ddiwedd y gofrestr o dan yr adran 'etholwyr eraill'. Mae'n bwysig cofio mewn gorsaf bleidleisio sydd wedi'i rhannu'n ddwy y gallai eu cofnod ymddangos ar y gofrestr ar gyfer yr orsaf bleidleisio arall.

Mae'r drefn ar gyfer rhoi papurau pleidleisio i etholwr dienw yn wahanol i'r drefn ar gyfer etholwyr cyffredin.

### Gweithdrefn ar gyfer rhoi papurau pleidleisio i etholwyr â chofnod dienw

Yn wahanol i etholwyr cyffredin, **rheid** i etholwyr dienw gael cerdyn pleidleisio ac ni allant bleidleisio hebdo:

- gofynnwch am eu cerdyn pleidleisio - ni fydd yn cynnwys eu henw na'u cyfeiriad ond bydd yn cynnwys eu rhif etholwr
- edrychwch yn y gofrestr - dylai fod 'N' i'w weld yn y cofnod ar gyfer y rhif etholwr hwnnw, yn hytrach nag enw a chyfeiriad
- tynnwch linell syth yn erbyn cofnod y pleidleisiwr yn y gofrestr
- peidiwch â gofyn am enw a chyfeiriad yr etholwr - galwch allan ei rif etholwr yn unig
- ysgrifennwch rif yr etholwr ar y rhestr neu'r rhestrau rhifau cyfatebol

- rhowch y papurau pleidleisio ac yna dychwelwch y cerdyn pleidleisio i'r etholwr

Gellir gofyn y cwestiynau rhagnodedig i bleidleisiwr â chofnod dienw yn y gofrestr hefyd, ond caiff ei enw a'i gyfeiriad eu hepgor (gweler Atodiad 5a).

### Beth os bydd etholwyr â chofnod dienw yn ymddangos yn yr orsaf bleidleisio heb gerdyn pleidleisio?

Os byddant wedi anghofio eu cerdyn pleidleisio, gofynnwch iddynt ddychwelyd i'r orsaf bleidleisio yn nes ymlaen gyda'u cerdyn pleidleisio. Os byddant yn honni nad ydynt wedi cael un neu eu bod wedi'i gollu, gofynnwch iddynt gysylltu â'r Swyddog Canlyniadau ar unwaith. Os caiff cerdyn pleidleisio newydd ei roi a bod yr etholwr yn dychwelyd i'r orsaf bleidleisio yn ddiweddarach gyda'r cerdyn hwn, rhaid rhoi papurau pleidleisio yn y ffordd a ddisgrifir uchod.

# Atodiad 5a

## Y cwestiynau rhagnodedig

Gellir gofyn y cwestiynau rhagnodedig i unrhyw etholwr neu ddirprwy. Fodd bynnag, rhaid i'r Swyddog Llywyddu ofyn y cwestiynau rhagnodedig mewn ffordd gywir a digynnwrf o dan yr amgylchiadau canlynol:

- Pan fo etholwr (sydd heb benodi dirprwy) yn gwneud cais am bapurau pleidleisio ond bod y gofrestr etholwyr yn dangos ei fod wedi pleidleisio eisoes. O dan yr amgylchiadau hyn, hyd yn oed os bydd yn ateb y cwestiynau'n foddhaol, dim ond papurau pleidleisio a gyflwynwyd y mae hawl gan yr etholwr eu cael.
- Pan fo cofnod dirprwy ar y rhestr dirprwyon wedi'i farcio eisoes a bod cofnod yr etholwr ar y gofrestr etholwyr wedi'i farcio hefyd. Ar ôl ateb y cwestiynau'n foddhaol, dim ond papurau pleidleisio a gyflwynwyd y mae hawl gan yr etholwr neu'r dirprwy eu cael.
- Pan fo dirprwy yn dychwelyd i'r orsaf bleidleisio ar ôl i'w gais i fwrw pleidlais fel dirprwy gael ei wrthod am fod y gofrestr etholwyr yn dangos bod y pleidleisiwr wedi pleidleisio yn bersonol (yn yr achos hwn, ni fyddai'r rhestr dirprwyon wedi'i marcio), a'i fod yn mynnu nad yw'r etholwr wedi pleidleisio. Os bydd yn ateb y cwestiynau'n foddhaol, bydd hawl ganddo gael papurau pleidleisio a gyflwynwyd.
- Pan fo enw etholwr (neu ddirprwy) yn ymddangos ar y rhestr pleidleiswyr post (neu'r rhestr dirprwyon sy'n pleidleisio drwy'r post) ond ei fod yn datgan na wnaeth gais i bleidleisio drwy'r post. Os bydd yr etholwr (neu'r dirprwy) yn ateb y cwestiynau'n foddhaol, rhaid rhoi papurau pleidleisio a gyflwynwyd iddo.
- Pan fo etholwr (neu ddirprwy) y mae ei enw yn ymddangos ar y rhestr pleidleiswyr post (neu'r rhestr dirprwyon sy'n pleidleisio drwy'r post) yn cyrraedd yr orsaf bleidleisio ar ôl 5pm ar y

diwrnod pleidleisio ac yn honni ei fod wedi colli neu ddifetha ei bapurau pleidleisio drwy'r post neu nad yw wedi eu cael o gwbl. Os bydd yn ateb y cwestiynau'n foddhaol, dim ond papurau pleidleisio a gyflwynwyd y bydd hawl gan yr etholwr (neu ddirprwy) eu cael.

- Pan fo ymgeisydd, asiant etholiad neu asiant pleidleisio yn gofyn i'r cwestiynau gael eu gofyn. Os caiff y cwestiynau rhagnodedig eu hateb yn foddhaol, rhaid rhoi papurau pleidleisio cyffredin.

Dylai'r Swyddog Llywyddu hefyd ofyn y cwestiynau rhagnodedig perthnasol o dan yr amgylchiadau canlynol:

- Pan fo etholwr yn dweud bod ei enw'n wahanol i'r un a gofnodir yn y gofrestr etholwyr. Wrth ateb y cwestiynau rhagnodedig, os gall yr etholwr gadarnhau bod y cofnod yn y gofrestr yn cyfeirio ato, rhaid rhoi papurau pleidleisio cyffredin.
- Pan fo staff gorsaf bleidleisio yn amau etholwr neu ddirprwy o gambersonadu. Wrth ateb y cwestiynau rhagnodedig, os gall yr etholwr gadarnhau bod y cofnod yn y gofrestr yn cyfeirio ato, rhaid rhoi papurau pleidleisio cyffredin.
- Pan fo'r etholwr wedi'i gofrestru fel rhywun sy'n gymwys i bleidleisio er ei fod yn amlwg o dan oedran. Os caiff y cwestiynau rhagnodedig eu hateb yn foddhaol, rhaid rhoi papurau pleidleisio cyffredin.

Ni ellir ymholi ynghylch hawl unrhyw berson i bleidleisio, heblaw am y cwestiynau statudol a ddangosir isod.

P'un a oes ganddo unrhyw amheuan ai peidio, rhaid i'r Swyddog Llywyddu roi papurau pleidleisio cyffredin neu bapurau pleidleisio a gyflwynwyd, fel y bo'n briodol, i unrhyw un sydd wedi ateb y cwestiynau'n gywir. Os bydd person yn gwrthod ateb y cwestiynau, yna ni ellir rhoi papurau pleidleisio cyffredin na phapurau pleidleisio a gyflwynwyd, fel y bo'n briodol. Os bydd y person hwnnw'n dychwelyd yn ddiweddarach, rhaid i'r Swyddog Llywyddu ofyn y cwestiynau rhagnodedig iddo unwaith eto.

Wrth ofyn y cwestiynau ar gyfer yr etholiad i Gynulliad Cenedlaethol Cymru ac etholiad Comisiynwyr yr Heddlu a Throsedd, dylai'r Swyddog Llywyddu fynegi'n glir pa gwestiynau sy'n berthnasol i bob etholiad. Gall etholwyr ofyn i'r cwestiynau rhagnodedig gael eu gofyn iddynt yn Gymraeg neu Saesneg. Mae'r fersiwn Saesneg o'r cwestiynau isod wedi'i chynnwys yn y copi Saesneg o'r llawlyfr hwn.

### Y cwestiynau rhagnodedig i'w gofyn i berson sy'n gwneud cais i bleidleisio fel etholwr

Ar gyfer yr etholiad i Gynulliad Cenedlaethol Cymru: 'Ai chi yw'r person sydd wedi'i gofrestru yn y gofrestr etholwyr llywodraeth leol fel a ganlyn (rhaid i chi ddarllen allan y cofnod cyfan o'r gofrestr)?'

#### AC

Ar gyfer etholiad Comisiynwyr yr Heddlu a Throsedd: 'Ai chi yw'r person sydd wedi'i gofrestru yn y gofrestr etholwyr fel a ganlyn (rhaid i chi ddarllen allan y cofnod cyfan o'r gofrestr)?'

Os mai 'na' yw'r ateb, peidiwch â rhoi papurau pleidleisio. Os mai 'ie' yw'r ateb, gofynnwch:

Ar gyfer yr etholiad i Gynulliad Cenedlaethol Cymru: 'A ydych eisoed wedi bwrw pleidlais etholaethol a phleidlais rhanbarth etholiadol yn yr etholiad hwn i'r Cynulliad, naill ai yma neu rywle arall, ac eithrio fel dirprwy ar ran rhywun?'

#### AC

Ar gyfer etholiad Comisiynwyr yr Heddlu a Throsedd: 'A ydych eisoed wedi pleidleisio yn yr etholiad hwn ar gyfer comisiynydd yr heddlu a throsedd, naill ai yma neu rywle arall, ac eithrio fel dirprwy ar ran rhywun arall?'

Os atebir 'ydw' i'r cwestiynau hyn, peidiwch â rhoi papurau pleidleisio. Os yw'r person wedi ateb 'ie' i'r cwestiynau cyntaf a 'nac ydw' i'r ail gwestiynau, rhaid rhoi papurau pleidleisio cyffredin neu bapurau pleidleisio a gyflwynwyd fel y bo'n briodol.

### Y cwestiynau rhagnodedig i'w gofyn i berson sy'n gwneud cais i bleidleisio fel dirprwy (ond nid ar ran etholwr â chofnod dienw)

Mae'r cwestiynau rhagnodedig ar gyfer dirprwyon wedi'u geirio'n wahanol:

Ar gyfer yr etholiad i Gynulliad Cenedlaethol Cymru: 'Ai chi yw'r person y mae ei enw yn ymddangos fel a ganlyn (darllenwch allan yr enw sy'n ymddangos yn y rhestr dirprwyon) yn y rhestr dirprwyon ar gyfer yr etholiad hwn i'r Cynulliad fel rhywun sydd â hawl i bleidleisio fel dirprwy ar ran (darllenwch allan enw'r etholwr ar y gofrestr)?'

#### AC

Ar gyfer etholiad Comisiynwyr yr Heddlu a Throsedd: 'Ai chi yw'r person y mae ei enw yn ymddangos fel a ganlyn (darllenwch allan yr enw sy'n ymddangos yn y rhestr dirprwyon) yn y rhestr dirprwyon ar gyfer yr etholiad hwn ar gyfer comisiynydd yr heddlu a throsedd fel rhywun sydd â hawl i bleidleisio fel dirprwy ar ran (darllenwch allan enw'r etholwr ar y gofrestr)?'

Os mai 'na' yw'r ateb, peidiwch â rhoi papurau pleidleisio. Os mai 'ie' yw'r ateb, gofynnwch:

Ar gyfer yr etholiad i Gynulliad Cenedlaethol Cymru: 'A ydych eisoed wedi bwrw pleidlais etholaethol a phleidlais rhanbarth etholiadol yn yr etholiad hwn i'r Cynulliad, naill ai yma neu rywle arall, ac eithrio ar ran (darllenwch allan enw'r etholwr ar y gofrestr)?'

## AC

Ar gyfer etholiad Comisiynydd yr Heddlu a Throseddu: **'A ydych eiso es wedi pleidleisio yn yr etholiad hwn ar gyfer comisiynydd yr heddlu a throseddu, naill ai yma neu rywle arall, fel y person sydd â hawl i bleidleisio fel dirprwy ar ran (darllenwch allan enw'r etholwr ar y gofrestr etholwyr)?'**

Os atebir 'ydw' i'r cwestiynau hyn, rhaid peidio â rhoi papurau pleidleisio. Os atebir 'nac ydw', gofynnwch:

**'A ydych yn wŵr/gwraig, yn bartner sifil, yn rhiant, yn dad-cu/mam-gu, yn frawd/chwaer, yn blentyn neu'n wŵr/wyres i (darllenwch allan enw'r etholwr ar y gofrestr)?'**

Os mai 'ydw' yw'r ateb i'r cwestiwn hwn (a bod y cwestiynau uchod wedi'u hateb yn foddhaol), rhaid rhoi papurau pleidleisio cyffredin neu bapurau pleidleisio a gyflwynwyd fel y bo'n briodol.

Fodd bynnag, os mai 'nac ydw' yw'r ateb, gofynnwch:

Ar gyfer yr etholiad i Gynulliad Cenedlaethol Cymru: **'Yn yr etholiad hwn i'r Cynulliad, a ydych eiso es wedi pleidleisio yn yr etholaeth hon ar ran dau berson nad ydych yn wŵr/gwraig, yn bartner sifil, yn rhiant, yn dad-cu/mam-gu, yn frawd/chwaer, yn blentyn neu'n wŵr/wyres iddynt?'**

## AC

Ar gyfer etholiad Comisiynwyr yr Heddlu a Throseddu: **'Yn yr etholiad hwn ar gyfer comisiynydd yr heddlu a throseddu, a ydych eiso es wedi pleidleisio yma neu rywle arall ar ran dau berson nad ydych yn wŵr/gwraig, yn bartner sifil, yn rhiant, yn dad-cu/mam-gu, yn frawd/chwaer, yn blentyn neu'n wŵr/wyres iddynt?'**

Os atebir 'ydw' i'r cwestiynau hyn, peidiwch â rhoi papurau pleidleisio. Os mai 'nac ydw' yw'r ateb (a bod y cwestiynau uchod wedi'u hateb yn foddhaol), rhaid rhoi papurau pleidleisio cyffredin neu bapurau pleidleisio a gyflwynwyd fel y bo'n briodol.

## Y cwestiynau rhagnodedig i'w gofyn i berson sy'n gwneud cais i bleidleisio fel dirprwy ar ran etholwr â chofnod dienw

Ar gyfer yr etholiad i Gynulliad Cenedlaethol Cymru: **'Ai chi yw'r person y mae hawl ganddo bleidleisio fel dirprwy ar ran yr etholwr sydd â'r rhif (darllenwch allan y rhif o'r gofrestr) yn y gofrestr etholwyr?'**

## AC

Ar gyfer etholiad Comisiynwyr yr Heddlu a Throseddu: **'Ai chi yw'r person y mae hawl ganddo bleidleisio fel dirprwy ar ran yr etholwr sydd â'r rhif (darllenwch allan y rhif o'r gofrestr) yn y gofrestr etholwyr?'**

Os mai 'na' yw'r ateb, peidiwch â rhoi papurau pleidleisio. Os mai 'ie' yw'r ateb, gofynnwch:

Ar gyfer yr etholiad i Gynulliad Cenedlaethol Cymru: **'A ydych eiso es wedi bwrw pleidlais etholaethol a phleidlais rhanbarth etholiadol yn yr etholiad hwn i'r Cynulliad, naill ai yma neu rywle arall, ar ran yr etholwr sydd â'r rhif (darllenwch allan rif yr etholwr o'r gofrestr) yn y gofrestr etholwyr?'**

## AC

Ar gyfer etholiad Comisiynwyr yr Heddlu a Throseddu: **'A ydych eiso es wedi pleidleisio yma neu rywle arall fel dirprwy ar ran yr etholwr sydd â'r rhif (darllenwch allan rif yr etholwr o'r gofrestr) yn y gofrestr etholwyr?'**

Os atebir 'ydw' i'r cwestiynau hyn, rhaid peidio â rhoi papurau pleidleisio. Os atebir 'nac ydw', rhaid i chi hefyd ofyn:

**'A ydych yn wŵr/gwraig, yn bartner sifil, yn rhiant, yn dad-cu/mam-gu, yn frawd/chwaer, yn blentyn neu'n wŵr/wyres i'r etholwr sydd â'r rhif (darllenwch allan rif yr etholwr o'r gofrestr) yn y gofrestr etholwyr?'**

Os mai 'ydw' yw'r ateb i'r cwestiwn hwn (a bod y cwestiynau uchod wedi'u hateb yn foddhaol), rhaid rhoi papurau pleidleisio cyffredin neu bapurau pleidleisio a gyflwynwyd fel y bo'n briodol.

Fodd bynnag, os mai 'nac ydw' yw'r ateb, gofynnwch:

Ar gyfer yr etholiad i Gynulliad Cenedlaethol Cymru: **'Yn yr etholiad hwn i'r Cynulliad, a ydych eisoed wedi pleidleisio yn yr etholaeth hon ar ran dau berson nad ydych yn wŵr/gwraig, yn bartner sifil, yn rhiant, yn dad-cu/mam-gu, yn frawd/chwaer, yn blentyn neu'n wŵr/wyres iddynt?'**

## AC

Ar gyfer etholiad Comisiynwyr yr Heddlu a Throseddu: **'Yn yr etholiad hwn ar gyfer comisiynydd yr heddlu a throseddu, a ydych eisoed wedi pleidleisio yma neu rywle arall ar ran dau berson nad ydych yn wŵr/gwraig, yn bartner sifil, yn rhiant, yn dad-cu/mam-gu, yn frawd/chwaer, yn blentyn neu'n wŵr/wyres iddynt?'**

Os atebir 'ydw' i'r cwestiynau hyn, peidiwch â rhoi papurau pleidleisio. Os mai 'nac ydw' yw'r ateb i'r cwestiwn hwn (a bod pob un o'r cwestiynau uchod wedi'u hateb yn foddhaol), rhaid rhoi papurau pleidleisio cyffredin neu bapurau pleidleisio a gyflwynwyd fel y bo'n briodol.

## Y cwestiynau rhagnodedig i'w gofyn i berson sy'n gwneud cais i bleidleisio yn bersonol pan fo'n ymddangos ar y gofrestr fel pleidleisiwr post

Mae'r cwestiynau rhagnodedig canlynol ar gyfer etholwyr sy'n ymddangos ar y gofrestr fel pleidleiswyr post, ond:

- sy'n honni nad ydynt wedi gwneud cais i bleidleisio drwy'r post neu
- sy'n mynd i'r orsaf bleidleisio ar ôl 5pm ar y diwrnod pleidleisio ac yn honni eu bod wedi colli eu papurau pleidleisio drwy'r post neu nad ydynt wedi eu cael o gwbl

**'A wnaethoch gais am bleidlais bost?'** (darllenwch ddwywaith - unwaith ar gyfer pob etholiad)

Os mai 'na' yw'r ateb, rhaid rhoi papurau pleidleisio a gyflwynwyd.

Os atebir 'do' i'r cwestiynau hyn, gofynnwch:

**'Pam nad ydych wedi pleidleisio drwy'r post?'** (darllenwch ddwywaith - unwaith ar gyfer pob etholiad)

Os atebir y cwestiwn yn foddhaol, dylai'r Swyddog Llywyddu gofnodi'r rheswm a rhoi papurau pleidleisio a gyflwynwyd.

Fodd bynnag, os bydd yr etholwr yn dweud nad yw wedi pleidleisio drwy'r post am ei fod wedi colli ei becyn pleidleisio drwy'r post neu heb ei gael (y pecyn cyfan neu ran ohono), dim ond ar ôl 5pm y gellir rhoi papurau pleidleisio a gyflwynwyd.

## Y cwestiynau rhagnodedig i'w gofyn i berson sy'n gwneud cais i bleidleisio fel dirprwy pan fo cofnod yn dangos ei fod wedi cael papurau pleidleisio drwy'r post ar gyfer dirprwy

Mae'r cwestiynau rhagnodedig ar gyfer dirprwyon sydd wedi'u henwi ar y rhestr dirprwyon sy'n pleidleisio drwy'r post ond sy'n honni nad ydynt wedi gwneud cais i bleidleisio drwy'r post neu sy'n mynd i'r orsaf bleidleisio ar ôl 5pm ar y diwrnod pleidleisio ac yn honni eu bod wedi colli eu papurau pleidleisio drwy'r post neu nad ydynt wedi'u cael o gwbl fel a ganlyn:

**'A wnaethoch gais i bleidleisio drwy'r post fel dirprwy?'** (darllenwch ddwywaith - unwaith ar gyfer pob etholiad)

Os mai 'na' yw'r ateb, rhaid rhoi papurau pleidleisio a gyflwynwyd.

Os mai 'do' yw'r ateb, gofynnwch:

**'Pam nad ydych wedi pleidleisio drwy'r post fel dirprwy?'** (darllenwch ddwywaith - unwaith ar gyfer pob etholiad)

Os atebir y cwestiwn yn foddhaol, dylai'r Swyddog Llywyddu gofnodi'r rheswm a rhoi papurau pleidleisio a gyflwynwyd.

Fodd bynnag, os bydd y dirprwy yn dweud nad yw wedi pleidleisio drwy'r post am ei fod wedi colli ei becyn pleidleisio drwy'r post neu heb ei gael (y pecyn cyfan neu ran ohono), dim ond ar ôl 5pm y gellir rhoi papurau pleidleisio a gyflwynwyd.

# Atodiad 5b

## Papurau pleidleisio a gyflwynwyd

### Amgylchiadau pan ddylid rhoi papurau pleidleisio a gyflwynwyd

#### Darllenwch y cyfarwyddiadau hyn yn ofalus cyn rhoi unrhyw bapurau pleidleisio a gyflwynwyd.

Rhaid i'r Swyddog Llywyddu sicrhau mai dim ond o dan yr amgylchiadau rhagnodedig y rhoddir papurau pleidleisio a gyflwynwyd. Dim ond o dan yr amgylchiadau canlynol y dylid rhoi papurau pleidleisio a gyflwynwyd:

- os bydd y gofrestr etholwyr (neu hysbysiad) yn dangos bod etholwr wedi pleidleisio'n barod
- os bydd cofnod dirprwy ar y rhestr dirprwyon wedi'i farcio'n barod a/neu fod cofnod yr etholwr a'i penododd yn ddirprwy wedi'i farcio
- os bydd etholwr (neu ddirprwy) sy'n ymddangos ar y rhestr pleidleiswyr post yn honni nad yw wedi gwneud cais am bleidlais bost. Caiff ofyn am becyn pleidleisio drwy'r post newydd gan y Swyddog Canlyniadau hyd at 5pm, ond gellir rhoi papurau pleidleisio a gyflwynwyd iddo ar unrhyw adeg os yw'n dymuno
- os bydd ar ôl 5pm a bod etholwr (neu ddirprwy) sy'n ymddangos ar y rhestr pleidleiswyr post yn honni ei fod wedi colli neu ddifetha ei bleidlais bost neu ei fod heb gael ei bleidlais bost o gwbl

Os caiff papurau pleidleisio a gyflwynwyd eu rhoi drwy gamgymeriad, rhaid i'r Swyddog Llywyddu gofnodi rhifau cyfresol y papurau pleidleisio a gyflwynwyd a gafodd eu rhoi drwy gamgymeriad a hysbysu'r Swyddog Canlyniadau cyn gynted â phosibl.

Cyn rhoi papurau pleidleisio a gyflwynwyd, dylai'r Swyddog Llywyddu egluro'r amgylchiadau i'r etholwr (neu'r dirprwy) ac wedyn rhaid iddo ofyn y cwestiynau rhagnodedig sy'n berthnasol i'w sefyllfa (gweler Atodiad 5a).

Os caiff y cwestiynau rhagnodedig eu hateb yn foddhaol, rhaid i'r Swyddog Llywyddu roi papurau pleidleisio a gyflwynwyd. Yna, dylai'r Swyddog Llywyddu egluro'r drefn pleidlais a gyflwynwyd i'r etholwr (neu'r dirprwy).

### Gweithdrefn ar gyfer rhoi papurau pleidleisio a gyflwynwyd

Ar ôl i'r cwestiynau rhagnodedig gael eu hateb yn foddhaol, rhaid ysgrifennu rhif etholwr yr etholwr (gan gynnwys cyfeirnod y dosbarth pleidleisio) yn erbyn rhifau'r papurau pleidleisio a gyflwynwyd sy'n cael eu rhoi ar y rhestr pleidleisiau a gyflwynwyd.

Sicrhewch fod y papurau pleidleisio a gyflwynwyd yn cynnwys y marc swyddogol, plygwch y papurau ac yna rhowch y papurau i'r pleidleisiwr neu'r dirprwy **heb eu plygu** fel y gallant weld yr holl ymgeiswyr a phleidiau sydd ar y papurau pleidleisio. Yna rhaid iddynt bleidleisio yn gyfrinachol, plygu'r papurau pleidleisio a gyflwynwyd a'u dychwelyd i'r Swyddog Llywyddu.

Rhaid peidio â rhoi'r papurau pleidleisio a gyflwynwyd yn y blwch neu'r blychau pleidleisio. Er mwyn sicrhau na fydd hyn yn digwydd, dylai'r Swyddog Llywyddu sefyll wrth ymyl y blwch neu'r blychau pleidleisio a gorchuddio'r twll neu'r tyllau.

Rhaid i'r Swyddog Llywyddu gymryd y papurau pleidleisio a gyflwynwyd sydd wedi eu plygu a'u harnodi ag enw'r pleidleisiwr ynghyd â'i rif etholwr (gan gynnwys cyfeirnod y dosbarth pleidleisio) a'u gosod yn yr amlen swyddogol a ddarperir. Yna, rhaid iddo gofnodi rhif etholwr ac enw'r pleidleisiwr ar y 'Rhestr pleidleisiau a gyflwynwyd'.

Os bydd dirprwy yn pleidleisio ar ran etholwr, arnodwch y papurau pleidleisio a gyflwynwyd ag enw'r dirprwy, ond rhif etholwr yr etholwr. Cofnodwch rif yr etholwr, ynghyd ag enw'r dirprwy, ar y 'Rhestr pleidleisiau a gyflwynwyd'.

## Rhesymau dros gwblhau papurau pleidleisio a gyflwynwyd

Weithiau, mae'n bosibl y bydd pleidleiswyr yn gofyn pam eu bod yn cael cynnig papurau pleidleisio a gyflwynwyd. Er na chaiff papurau pleidleisio a gyflwynwyd eu cynnwys yn y cyfrif, mae papur pleidleisio a gyflwynwyd yn dangos bod gan bleidleisiwr bryder am drefn cynnal yr etholiad ar y cam pleidleisio, yn hytrach nag ar ôl i'r canlyniad gael ei gyhoeddi. Felly, papurau pleidleisio a gyflwynwyd yw'r cam cyntaf yn y broses o wneud cwyn am y broses etholiadol. Os na fydd pleidleisiwr yn cymryd y cam hwn, gallai olygu nad oes cofnod ffurfiol ar gael i ddangos ei fod wedi ceisio, ond methu, bwrw ei bleidlais.

Yn ogystal, bob tro y rhoddir papurau pleidleisio a gyflwynwyd, cofnodir enw'r pleidleisiwr a'i rif etholwr ar y rhestr pleidleisiau a gyflwynwyd. Mae'r rhestr hon yn galluogi swyddogion yr etholiad i weld a oes unrhyw batrymau cambersonadu posibl yn eu hardal.



# Atodiad 6

## Diogelwch yn yr orsaf bleidleisio

Y Swyddog Llywyddu sy'n gyfrifol am ddiogelwch yr orsaf bleidleisio. Mae pleidleiswyr yn disgwyl i orsafoedd pleidleisio gael eu rhedeg mewn ffordd drefnus a digynnwrf.

### Cadw trefn

Rhaid i Swyddogion Llywyddu gadw trefn yn yr orsaf bleidleisio. Mae hawl ganddynt orchymyn i berson gael ei hebrwng o'r orsaf bleidleisio. Fodd bynnag, rhaid gadael i bleidleiswyr cymwys bleidleisio cyn iddynt gael eu hebrwng allan. Dylai Swyddog Llywyddu sy'n gorchymyn i berson gael ei hebrwng allan, gofnodi manylion y digwyddiad a'i drosglwyddo i'r Swyddog Canlyniadau.

Ni all person sydd wedi cael ei hebrwng o'r orsaf bleidleisio ac sydd heb bleidleisio fynd yn ôl i mewn i'r orsaf heb ganiatâd y Swyddog Llywyddu. Os bydd y person yn dychwelyd ac yn ymddwyn yn weddus, rhaid rhoi cyfle iddo bleidleisio.

Ni cheir diffiniad cyfreithiol o gwmpas yr orsaf bleidleisio ond, fan lleiaf, mae'n golygu'r ystafell bleidleisio.

### Aflonyddwch neu ddigwyddiadau difrifol a gohirio'r bleidlais

Bydd yr heddlu wedi cael gwybod am leoliad gorsafoedd pleidleisio. Efallai y caiff swyddogion heddlu a swyddogion cymorth cymunedol yr heddlu ddyletswyddau'n ymwneud â gorsafoedd pleidleisio ac efallai y byddant yn ymweld â hwy yn ystod y dydd. Os bydd anhrefn yn yr orsaf bleidleisio yn ystod y dydd, cysylltwch â'r Swyddog Canlyniadau i'w hysbysu o'r sefyllfa. Os oes angen, cysylltwch â'r heddlu i ddelio â'r problem.

Os bydd aflonyddwch neu ddigwyddiad difrifol e.e. pryder ynghylch bom, tân, llifogydd ac ati, efallai y gofynnir i'r Swyddog Llywyddu wagio'r safle neu efallai y bydd yn penderfynu gwneud hynny. Os bydd y gwasanaethau brys yn gofyn i'r adeilad gael ei wagio, rhaid gwneud hynny. Hysbyswch y Swyddog Canlyniadau ar unwaith a gofynnwch am arweiniad ar unrhyw gamau pellach y dylid eu cymryd.

Peidiwch byth â pheryglu diogelwch personol y pleidleiswyr nac aelodau eraill o dîm yr orsaf bleidleisio, na pheri perygl o anaf i berson. Os yw'n bosibl gwneud hynny heb beryglu diogelwch personol, gellir symud holl ddeunyddiau sensitif yr etholiad (y blwch neu'r blychau pleidleisio, papurau pleidleisio, cofrestr etholwyr ac ati) o'r adeilad a'u cadw dan ofal staff yr orsaf bleidleisio. Dylech roi'r wybodaeth ddiweddaraf am yr hyn rydych yn ei wneud i unrhyw asiantiaid neu arsylwyr sy'n bresennol.

Os bydd yn rhaid gadael y safle, sefydlwch orsaf bleidleisio dros dro mewn man sydd bellter diogel o'r aflonyddwch neu'r digwyddiad difrifol. P'un a fu toriad yn y pleidleisio ai peidio, rhaid i'r orsaf bleidleisio gau am 10pm o hyd. Fodd bynnag, dylid nodi'r amser pan na fu modd i'r orsaf bleidleisio weithredu.

Yn yr achos mwyaf eithafol, bydd y Swyddog Canlyniadau yn caniatáu i'r Swyddog Llywyddu ohirio'r bleidlais tan y diwrnod canlynol. Os caiff y bleidlais ei gohirio, bydd y Swyddog Canlyniadau yn trefnu bod deunyddiau'r etholiad yn cael eu casglu.

**Rhaid i Swyddogion Llywyddu beidio â gohirio'r bleidlais heb ganiatâd y Swyddog Canlyniadau.**

## Delio â sefyllfaoedd anodd

Mae'n bosibl y daw staff gorsafoedd pleidleisio ar draws sefyllfaoedd anodd neu ymddygiad bygythiol yn ystod y diwrnod pleidleisio.

Gallai'r camau canlynol helpu staff gorsafoedd pleidleisio i ddelio â sefyllfaoedd a allai fod yn anodd neu'n heriol:

- **Gwrandewch ar y pleidleisiwr** – mae'n arfer da edrych ar y person pan fo'n siarad, gan ddangos diddordeb.
- **Dangoswch ddealltwriaeth** – gadewch i'r person wybod eich bod yn gwneud eich gorau i ddeall y broblem o'i safbwynt ef. Mae hyn yn pwysleisio'r ffaith bod penderfyniad gwybodus yn cael ei ystyried.
- **Holwch** – gofynnwch i'r person a oes unrhyw wybodaeth berthnasol arall y gall ei rhoi a allai helpu i hwyluso'r broses.
- **Crynowch** – rhowch yr ymateb a'r rheswm drosto. Peidiwch â dechrau dadlau.

## Atodiad 7

# Gweithdrefn ar gyfer delio â chambersonadu

### Beth sy'n digwydd os bydd staff gorsaf pleidleisio yn amau bod rhywun yn cambersonadu etholwr neu ddirprwy?

Ar adegau prin, mae'n bosibl y bydd aelod o dîm yr orsaf pleidleisio, etholwr arall, asiant etholiad, asiant pleidleisio neu ymgeisydd yn amau bod person sy'n gwneud cais am bapurau pleidleisio yn esgus bod yn rhywun arall. Gelwir hyn yn gambersonadu ac mae'n drosedd ddifrifol.

Cofiwch nad yw person, heblaw am ddirprwy, yn euog o gambersonadu os bydd yn gwneud cais am bapurau pleidleisio dan enw gwahanol i'w enw ei hun, ar yr amod mai o dan yr enw hwn y cafodd ei gofrestru.

Rhaid i Swyddogion Llywyddu beidio â chroesholi person os ydynt yn amau ei fod yn cambersonadu. Dim ond y cwestiynau rhagnodedig y gellir eu gofyn. Rhaid gofyn y cwestiynau hyn i'r person cyn rhoi papurau pleidleisio iddo, nid ar ôl hynny (gweler Atodiad 5a).

Mae'r cwestiynau rhagnodedig yn pennu p'un ai'r etholwr yw'r person sy'n ymddangos ar y gofrestr etholwyr (neu'r rhestr dirprwyon os yw'n pleidleisio fel dirprwy ar ran rhywun arall), a ph'un a yw'r etholwr wedi pleidleisio'n barod yn yr etholiadau (neu ar ran yr etholwr hwnnw, os mai dirprwy ydyw).

Os bydd y person yn ateb y cwestiynau'n foddhaol, rhaid rhoi papurau pleidleisio cyffredin. Fodd bynnag, dylai'r Swyddog Llywyddu roi gwybod i'r Swyddog Canlyniadau am ei amheuan cyn gynted â phosibl.

Os ceir gwrthdaro, neu os yw'n rhesymol disgwyl y bydd gwrthdaro, dylai'r Swyddog Llywyddu ystyried ei ddiogelwch ei hun a diogelwch pawb arall sy'n bresennol fel blaenoriaeth. Gellir ystyried ffyrdd eraill o helpu ymchwiliadau yn y dyfodol, er enghraifft, cofnodi rhifau cofrestru cerbydau a chadw eitemau a gafodd eu cyffwrdd gan berson sy'n rhan o ddigwyddiad, os yw'n ddiogel gwneud hynny, nes i swyddog heddlu gyrraedd.

Os caiff person ei arestio ar amheuaeth o gambersonadu neu ar amheuaeth ei fod ar fin cambersonadu, rhaid peidio ag atal y person hwnnw rhag pleidleisio cyn belled â'i fod yn ateb y cwestiynau rhagnodedig yn foddhaol.

### Beth sy'n digwydd os bydd asiant etholiad, asiant pleidleisio neu ymgeisydd yn herio pleidleisiwr?

Os bydd asiant etholiad, asiant pleidleisio neu ymgeisydd yn herio pleidleisiwr (drwy'r Swyddog Llywyddu), rhaid peidio ag atal y pleidleisiwr rhag pleidleisio cyn belled â'i fod yn ateb y cwestiynau rhagnodedig yn gywir.

### Beth sy'n digwydd os bydd yn ymddangos bod rhywun arall (heblaw am ddirprwy) wedi pleidleisio ar ran y pleidleisiwr?

Ar adegau prin, bydd person yn gofyn am bapurau pleidleisio ac yn darganfod bod ei enw ar y gofrestr etholwyr wedi'i farcio i ddangos ei fod wedi pleidleisio eisoes. Os bydd yn ymddangos bod rhywun arall heblaw am ei ddirprwy penodedig wedi pleidleisio ar ran etholwr, dylid dilyn y broses ar gyfer pleidleisiau a gyflwynwyd a nodir yn Atodiad 5b.

# Atodiad 8

## Arweiniad ar rifwyr, y cyfryngau a pholau ymadael

### Rhifwyr

Mae rhifwyr yn gwirfoddoli i bleidiau ac ymgeiswyr. Maent yn sefyll y tu allan i orsafoedd pleidleisio neu fannau pleidleisio ac yn cofnodi rhifau etholwyr sydd wedi pleidleisio. Drwy nodi etholwyr nad ydynt wedi pleidleisio a rhoi'r wybodaeth hon i'r blaid, yr ymgeisydd neu eu cefnogwyr, mae rhifwyr yn chwarae rhan hanfodol a phwysig mewn etholiadau. Wedyn, gall y blaid, yr ymgeisydd neu eu cefnogwyr gysylltu â'r pleidleiswyr nad ydynt wedi pleidleisio eto yn ystod y diwrnod pleidleisio a'u hannog i bleidleisio.

Ni ddylai fod mwy nag un rhifwr y tu allan i orsaf bleidleisio ar gyfer pob ymgeisydd ar unrhyw adeg. Pan fydd man pleidleisio yn cynnwys mwy nag un orsaf bleidleisio â gwahanol fynedfeydd, gall fod yn briodol cael rhifwyr wrth bob un, ond dim mwy nag un ar gyfer pob ymgeisydd.

Nid oes gan rifwyr statws cyfreithiol ac mae gan bleidleiswyr yr hawl i wrthod rhoi unrhyw wybodaeth iddynt. Gall y Swyddog Canlyniadau neu ei staff roi rhagor o arweiniad ar weithgareddau rhifwyr.

#### Rhaid i rifwyr:

- aros y tu allan i'r orsaf bleidleisio drwy'r amser
- dim ond mynd i mewn i'r orsaf bleidleisio i fwrw eu pleidlais eu hun, pleidleisio fel dirprwy neu fod yn gydymaith i bleidleisiwr anabl
- cydymffurfio â chyfarwyddiadau'r Swyddog Canlyniadau a'r Swyddog Llywyddu bob amser

#### Ni chaiff rhifwyr:

- weld na chlywed yr hyn sy'n digwydd y tu mewn i'r orsaf bleidleisio
- rhwystro neu fygyly pleidleiswyr wrth iddynt fynd i mewn i'r orsaf bleidleisio neu adael

- mynnu cael gwybodaeth am rif etholwr, enw neu gyfeiriad pleidleisiwr
- gofyn i bleidleiswyr ddychwelyd i'r orsaf bleidleisio i gael eu rhif etholwr
- cynnal trafodaethau â phleidleiswyr a allai arwain at honiadau o ddylanwad gormodol (e.e. bwriadau pleidleisio, ymlyniadau gwleidyddol neu ymgyrchoedd plaid)
- arddangos unrhyw ddeunydd ymgyrchu sydd o blaid neu yn erbyn unrhyw blaid wleidyddol neu ymgeisydd unigol ar wahân i roséd neu fathodyn

#### Gall rhifwyr:

- ofyn i bleidleiswyr am wybodaeth wrth iddynt fynd i mewn i'r orsaf bleidleisio neu adael
- arddangos rhesed neu fathodyn lliw sy'n dangos enw'r ymgeisydd neu'r blaid wleidyddol; ni ddylai'r roséd/bathodyn gynnwys slogan ac ni ddylent fod yn rhy fawr

Dylai'r Swyddog Llywyddu gadw llygad ar weithgareddau rhifwyr o bryd i'w gilydd a sicrhau nad ydynt yn rhwystro'r fynedfa nac yn rhwystro pleidleiswyr rhag mynd i mewn i'r orsaf bleidleisio.

### Y cyfryngau

Nid oes hawl gan gynrychiolwyr y cyfryngau i fynd i mewn i orsaf bleidleisio ac eithrio fel pleidleiswyr neu arsylwyr achrededig. Rhaid peidio â gadael iddynt ffilmio na chyfweld â phleidleiswyr yn yr orsaf bleidleisio. Os bydd criw ffilmio yn ffilmio neu'n cynnal cyfweiliadau y tu allan i'r orsaf bleidleisio, sicrhewch na chaiff pleidleiswyr eu rhwystro a'u poeni ar eu ffordd i bleidleisio, nad yw'r camerâu wedi'u lleoli mewn mannau a allai beryglu cyfrinachedd y bleidlais ac na chaiff y fynedfa i'r orsaf bleidleisio ei rhwystro.

## Polau ymadael

Gall cwmnïau polau piniwn cyhoeddus gael eu comisiynu i drefnu polau ymadael ar gyfer yr etholiadau. Mae'n bosibl y bydd y Swyddog Canlyniadau wedi cysylltu â Swyddogion Llywyddu os bydd cwmni polau yn bwriadu cynnal pŵl ymadael y tu allan i'r orsaf bleidleisio. Os felly, gwnewch yn siŵr nad yw'r cyfwelwyr yn dod i mewn i'r orsaf bleidleisio nac yn rhwystro'r fynedfa.

# Atodiad 9

## Iechyd a diogelwch

### Iechyd a diogelwch staff yr orsaf bleidleisio ac etholwyr

Rhaid i Swyddogion Llywyddu a Chlercod Pleidleisio fod yn ymwybodol o unrhyw risgiau posibl i ddiogelwch drwy gydol y diwrnod pleidleisio. Er mwyn gwneud hyn, rhaid archwilio'r safle cyfan a'r ardal gyfagos y tu allan. Os nodir unrhyw beryglon, mae angen ystyried sut i'w lliniaru. Cysylltwch â deiliad yr allwedd yn gyntaf, os yw hynny'n briodol ac yn bosibl.

Os bydd damwain yn digwydd i unrhyw un yn yr orsaf bleidleisio, rhaid cadw cofnod o'r digwyddiad a chofnodi'r wybodaeth ganlynol:

- enw llawn a chyfeiriad y person dan sylw
- amser y ddamwain
- lleoliad y ddamwain
- manylion cryno ynghylch y ddamwain
- tystiolaeth o anaf neu ddifrod
- enw a chyfeiriad unrhyw dystion
- yr amodau ar y pryd
- y camau a gymerwyd gan staff yr orsaf bleidleisio
- enw'r meddyg neu'r parafeddyg a gafodd ei alw
- manylion unrhyw ymweliad â'r ysbyty

Dylid hysbysu'r Swyddog Canlyniadau ar unwaith.

### Codi gwrthrychau trwm

Isod, ceir rhestr o bwyntiau a allai, os cânt eu dilyn, leihau'r risg o anaf i'r rhai sy'n codi a chario gwrthrychau:

- Cyn ceisio codi neu symud unrhyw wrthrych, profwch y pwysau drwy ei ogwyddo i un ochr er mwyn canfod pa mor drwm yw'r llwyth a safle ei graidd disgyrchiant.
- Cyn dechrau codi neu symud gwrthrychau, sicrhewch fod eich ardal waith yn glir ac yn ddirwystr.
- Sicrhewch fod gennych afael gadarn a chyfforddus cyn codi.
- Sicrhewch eich bod yn gadarn ar eich traed cyn codi.
- Wrth godi, cadwch eich pen i fyny, eich cefn yn syth, eich traed fymryn ar wahân ac, os yw hynny'n bosibl, codwch o'ch pengliniau gan ddefnyddio cyhyrau eich coesau.
- Cadwch y gwrthrych rydych yn ei godi mor agos at eich corff â phosibl.
- Peidiwch â phentyrru gwrthrychau mor uchel nes peri i chi neu'ch llwyth syrthio i un ochr.
- Peidiwch â phentyrru gwrthrychau mor uchel fel na allwch weld i ble rydych yn mynd.
- Os na allwch godi neu symud y llwyth ar eich pen eich hun, gofynnwch am gymorth.
- Helpwch eraill i godi neu symud llwyth os bydd rhywun yn gofyn i chi wneud hynny.

## Atodiad 10

# Cwestiynau cyffredin a ofynnir i staff gorsafoedd pleidleisio ar y diwrnod pleidleisio

### **C. Pam mae angen i chi ysgrifennu fy rhif etholwr wrth ymyl rhifau fy mhapurau pleidleisio? Ydy hyn yn golygu nad yw fy mhleidlais yn gyfrinachol?**

A. Mae'r gofyniad i gofnodi'r rhif etholwr ar y rhestr hon yn erbyn rhif y papurau pleidleisio a roddir i chi wedi'i gynnwys yn rheolau'r etholiad. Yn ei hanfod, fersiwn fwy diweddar yw'r system hon o system sy'n dyddio o Ddeddf Pleidlais 1872, a gyflwynwyd er mwyn osgoi'r posibilrwydd y defnyddir papurau pleidleisio ffug ac er mwyn helpu i ganfod twyll honedig.

Yn amlwg, os yw'r papurau pleidleisio wedi'u rhifo, mae'n llawer anoddach i berson diegwyddor roi copiâu o bapurau pleidleisio swyddogol yn y blwch neu'r blychau pleidleisio. Os bydd gweithred dwyllodrus wedi digwydd, byddai'n bosibl canfod y drosedd drwy gyfeirio at y rhestr neu'r rhestrau rhifau cyfatebol.

Mae mesur diogelwch ar waith i atal rhifau'r papurau pleidleisio ar y rhestr neu'r rhestrau rhifau cyfatebol rhag cael eu cysylltu â'r papurau pleidleisio a farciwyd. Ar ddiwedd y pleidleisio, caiff y rhestr neu'r rhestrau rhifau cyfatebol eu gosod mewn amlen wedi'i selio gan y Swyddog Llywyddu yn yr orsaf bleidleisio. Yna rhoddir yr amlen wedi'i selio i'r Swyddog Canlyniadau. Ar ôl cynnal y cyfrif, caiff y papurau pleidleisio a ddefnyddiwyd eu selio hefyd. Dim ond ar orchymyn barnwr o ganlyniad i ddeiseb etholiad neu er mwyn helpu i ymchwilio i drosedd etholiad honedig y gellir agor y pecynnau wedi'u selio. Hyd yn oed bryd hynny, anaml iawn y caiff y dogfennau eu harchwilio ac eithrio lle yr ymchwilir i achos o dwyll neu gambersonadu (h.y. rhywun yn pleidleisio'n anghyfreithlon ar ran rhywun arall).

O ganlyniad i'r mesurau diogelwch uchod, mae bron yn amhosibl i unrhyw unigolyn fod mewn sefyllfa lle y gall baru pleidleisiwr â phapur pleidleisio penodol.

Am y rheswm hwnnw, gall pleidleiswyr fod yn hyderus y bydd y bleidlais yn aros yn gyfrinachol. Nid oes gan bleidleiswyr unrhyw sail i ofni bod modd canfod dros bwy y gwnaethant bleidleisio, ac eithrio o dan yr amgylchiadau arbennig iawn a nodwyd uchod.

### **C. Rwyf wedi anghofio anfon fy mhleidlais bost. A allaf bleidleisio yma yn yr orsaf bleidleisio yn lle hynny?**

A. Ni allwn roi papurau pleidleisio cyffredin i chi yma yn yr orsaf bleidleisio. Fodd bynnag, nid oes angen i chi bostio eich pleidlais bost er mwyn pleidleisio: gallwch fynd â'ch pleidlais bost i'ch gorsaf bleidleisio (neu unrhyw orsaf bleidleisio arall yn yr ardal etholiadol berthnasol) neu gall rywun wneud hynny ar eich rhan. Mae gorsafoedd pleidleisio yn cau am 10pm. Fel arall, gallwch fynd â'ch pleidlais bost i'r swyddfa etholiadau yn y cyngor lleol.

### **C. Nid yw fy mhleidlais bost wedi cyrraedd eto - beth allaf ei wneud?**

A. **Cyn 5pm:** Gallwch gael pleidlais newydd os gallwch gyrraedd y swyddfa etholiadau cyn 5pm heddiw. Bydd angen i chi ddod â rhyw fath o ddogfen adnabod gyda chi. Gall staff y swyddfa etholiadau roi rhagor o wybodaeth am y drefn hon a dweud wrthy ch ba fath o ddogfennau adnabod sy'n dderbyniol.

**Ar ôl 5pm:** Mae hawl gennych i gael papurau pleidleisio a gyflwynwyd. Os ydych wedi eich cynnwys ar gofrestr yr orsaf bleidleisio hon a'ch bod yn ateb y cwestiynau rhagnodedig yn foddhaol, gallwn roi'r papurau hyn i chi.

**C. Mae fy mhleidlais bost wedi cyrraedd, ond rwyf wedi colli fy mhapur(au) pleidleisio. Beth allaf ei wneud?**

A. **Cyn 5pm:** Gallwch gael pleidlais newydd os gallwch gyrraedd y swyddfa etholiadau cyn 5pm ar y diwrnod pleidleisio. Bydd angen i chi ddod ag unrhyw ddarnau o'ch pecyn pleidleisio drwy'r post sydd gennych o hyd a rhyw fath o ddogfen adnabod gyda chi. Gall staff y swyddfa etholiadau roi rhagor o wybodaeth am y drefn hon a dweud wrthyfych pa fath o ddogfennau adnabod sy'n dderbyniol.

**Ar ôl 5pm:** Mae hawl gennych i gael papurau pleidleisio a gyflwynwyd. Os ydych wedi eich cynnwys ar gofrestr yr orsaf bleidleisio hon a'ch bod yn ateb y cwestiynau rhagnodedig yn foddhaol, gallwn roi'r papurau hyn i chi.

**C. Rwyf wedi cael fy mhleidlais bost ond rwyf wedi newid fy meddwl ac rwyf am bleidleisio'n bersonol yn yr orsaf bleidleisio. A allaf ganslo fy mhleidlais bost?**

A. Na allwch - unwaith y cewch bleidlais bost, rhaid i chi ei defnyddio er mwyn pleidleisio yn yr etholiadau hyn; ni ellir rhoi papurau pleidleisio i chi mewn gorsaf bleidleisio. Fodd bynnag, gallwch fynd â'ch pleidlais bost wedi'i chwblhau, ac wedi'i selio yn yr amlenni a ddarparwyd, i'ch gorsaf bleidleisio neu unrhyw orsaf bleidleisio yn yr ardal etholiadol berthnasol ar y diwrnod pleidleisio. Os hoffech ganslo eich pleidlais bost ar gyfer etholiadau a refferenda yn y dyfodol, cysylltwch â'r Swyddog Cofrestru Etholiadol.

**C. Pa ots os nad ydw i wedi cofrestru - roeddwn i'n meddwl bod hawl gan bawb i bleidleisio?**

A. Rhaid i chi fod ar y gofrestr etholwyr i allu pleidleisio. Er mwyn cael eich cynnwys ar y gofrestr a phleidleisio mewn etholiadau a refferenda yn y dyfodol, bydd angen i chi wneud cais i'r Swyddog Cofrestru Etholiadol.

Os ydych yn sicr eich bod wedi gwneud cais i gofrestru, cysylltwch â'r swyddfa cofrestru etholiadol.

**C. Mae fy ngŵr wedi cael damwain yn y gwaith ac wedi cael ei ruthro i'r ysbyty. Mae'n awyddus iawn i bleidleisio - a oes unrhyw beth y gellir ei wneud?**

A. Mae'n bosibl y gallai benodi dirprwy i bleidleisio ar ei ran. Y terfyn amser ar gyfer gwneud hyn yw 5pm heddiw. Gall staff yn y swyddfa etholiadau roi mwy o fanylion i chi am y drefn hon.



# Atodiad 11

## Rhestr wirio ar gyfer gosod yr orsaf bleidleisio

Dylid defnyddio'r rhestr wirio hon cyn i'r bleidlais agor er mwyn sicrhau bod yr orsaf bleidleisio yn cael ei gosod yn gywir.

### Y tu allan i'r orsaf bleidleisio

Cwblhawyd

#### Mynedfa, allanfa a llwybrau

A yw'r arwyddion at yr orsaf yn glir ac a all etholwyr weld ble mae'r orsaf bleidleisio yn hawdd?

A oes lleoedd parcio wedi'u cadw i bobl anabl?

Gwnewch yn siŵr nad oes peryglon rhwng y lleoedd parcio a'r fynedfa i'r orsaf bleidleisio

#### Arwyddion

A ydych wedi sicrhau bod arwyddion da ar gyfer unrhyw fynedfa amgen i bobl anabl, ac a all rhywun mewn cadair olwyn eu darllen?

A yw'r hysbysiad 'Sut i bleidleisio yn yr etholiadau hyn' (gan gynnwys unrhyw fersiynau a ddarparwyd mewn ieithoedd a fformatau eraill) i'w weld y tu allan i'r orsaf bleidleisio ac yn hygyrch i bob pleidleisiwr?

#### Mynediad gwastad

A oes ramp addas ar gael sy'n rhydd rhag rhwystrau?

A yw'r ramp yn sefydlog? Os nad ydy, cysylltwch â'r swyddfa etholiadau ar unwaith

A yw'r matiau drws yn lefel â'r llawr? Os nad ydynt, symudwch hwy

#### Mynedfeydd

A ydych wedi archwilio unrhyw ddrysau dwbl i sicrhau bod mynediad da i bawb?

A oes arwyddion priodol ar gael i ddangos drws unrhyw fynedfa amgen i bobl anabl?

### Y tu mewn i'r orsaf bleidleisio

A yw'r orsaf bleidleisio wedi'i gosod er mwyn gwneud y defnydd gorau o'r lle sydd ar gael?

Dilynwch y llwybr y bydd disgwyl i'r pleidleisiwr ei ddilyn, a gwnewch yn siŵr y bydd cynllun yr ystafell yn gweithio i bleidleiswyr, gan ystyried sut y byddant yn symud drwy'r broses bleidleisio o'r adeg pan fyddant yn dod i mewn i'r orsaf bleidleisio hyd nes y byddant yn ei gadael.

A fyddai cynllun yr ystafell yn gweithio pe bai grŵp o etholwyr yn aros i fwrw eu pleidlais?

A wneir y defnydd gorau o'r goleuadau a'r golau naturiol sydd ar gael?

A oes sedd ar gael rhag ofn y bydd angen i etholwr eistedd i lawr?

## Hysbysiadau swyddogol

A yw'r hysbysiad 'Sut i bleidleisio yn yr etholiadau hyn' (gan gynnwys unrhyw fersiynau a ddarparwyd mewn ieithoedd a fformatau eraill) i'w weld y tu mewn i'r orsaf bleidleisio ac yn hygyrch i bob pleidleisiwr?

A yw'r hysbysiad sy'n rhoi gwybodaeth am sut i farcio'r papurau pleidleisio (gan gynnwys unrhyw fersiynau a ddarparwyd mewn ieithoedd a fformatau eraill) wedi'i osod ym mhob un o'r bythau pleidleisio?

Wrth i chi ddilyn y llwybr y bydd disgwyl i'r pleidleisiwr ei ddilyn, a yw'r posteri a'r hysbysiadau i'w gweld yn glir, gan gynnwys i bobl sy'n defnyddio cadair olwyn?

A ydych wedi sicrhau na chaiff yr hysbysiadau/posteri eu harddangos yng nghanol posteri eraill a fyddai'n ei gwneud yn anodd i'r etholwyr eu gweld?

## Bythau pleidleisio/ blwch/blychau pleidleisio

A yw'r blwch neu'r blychau pleidleisio wedi'u gosod yn union gerllaw'r Swyddog Llywyddu?

A yw'r blwch neu'r blychau pleidleisio wedi'u selio'n gywir?

A all defnyddiwr cadair olwyn gyrraedd y blwch neu'r blychau pleidleisio yn hawdd?

A all defnyddiwr cadair olwyn fynd i mewn i'r bwth pleidleisio yn hawdd?

A yw'r bythau pleidleisio wedi'u gosod yn gywir ac wedi'u lleoli'n bwrpasol er mwyn gwneud y defnydd gorau o'r goleuadau a'r golau naturiol?

A ydych wedi sicrhau bod bythau pleidleisio wedi'u lleoli fel na all pobl y tu allan weld sut mae pleidleiswyr yn marcio eu papurau pleidleisio?

A all y Swyddog Llywyddu a'r Clerc Pleidleisio eu gweld yn glir?

A oes pennau/pensiliau ar gael ym mhob bwth ac a yw unrhyw bensiliau wedi'u miniogi?

A yw'r llinyn sydd ynghlwm wrth y pennau/pensiliau yn ddigon hir i faint y papurau pleidleisio ac i bleidleiswyr llaw dde a llaw chwith?

## Papurau pleidleisio print bras a samplau llaw o bapurau pleidleisio

A yw'r papurau pleidleisio print bras yn weladwy i bob pleidleisiwr?

A yw'r samplau llaw ar gael ac yn weladwy i bleidleiswyr?

## Templed cyffyrddadwy

A yw'r templed cyffyrddadwy ar gael ac yn weladwy i bawb?

A yw'r holl staff yn gwybod sut i'w ddefnyddio?

## Papurau pleidleisio

Ai'r papurau pleidleisio hyn yw'r rhai cywir ar gyfer yr orsaf bleidleisio ac a ydynt wedi'u rhifo'n gywir a'u pentyrru yn eu trefn?

## Y rhestr neu'r rhestrau rhifau cyfatebol

A yw rhifau'r papurau pleidleisio ar y rhestr neu'r rhestrau rhifau cyfatebol wedi'u hargraffu mewn trefn rifol?

A yw rhifau'r papurau pleidleisio sydd wedi'u hargraffu ar y rhestr neu'r rhestrau rhifau cyfatebol yn cyd-fynd â'r rhifau ar y papurau pleidleisio?

## Cofrestr

A oes gennych y gofrestr gywir ar gyfer eich gorsaf bleidleisio?



Y Comisiwn Etholiadol  
Swyddfa Cymru  
Tŷ'r Cwmnïau  
Crown Way  
Caerdydd CF14 3UZ  
Ffôn 0333 103 1929  
[gwybodaeth@comisiwnetholiadol.org.uk](mailto:gwybodaeth@comisiwnetholiadol.org.uk)  
[www.comisiwnetholiadol.org.uk](http://www.comisiwnetholiadol.org.uk)

Rydym yn gorff annibynnol a sefydlwyd gan Senedd y DU. Rydym yn rheoleiddio cyllid pleidiau ac etholiadau ac yn gosod safonau ar gyfer etholiadau a gynhelir yn dda. Rydym yn gweithio i gefnogi democratiaeth iach, lle y seilir etholiadau a refferenda ar ein hegwyddorion, sef ymddiriedaeth, cyfranogiad a dim dylanwad gormodol.

Rhoi pleidleiswyr yn gyntaf